

PL
2694
S8
1682

Sung, Lien
Sung Wên-hsien hsien shêng
chi

CALL NO:

AUTHOR:

PL
2694
S8
1682

Sung,

TITLE:

Sung Wên-hsien
hsien shêng chi

EAS

VOL:

22/71

祖靈川卷上

王集

PL
2694
S8
1682

晉江張夏鍾先生評選

明五大家集

宋文憲先生


方正學先生

王遵巖先生

唐荆川先生

歸震川先生

視古堂藏版



總序

文所以明道也古之聖人
急于明道不得已而有文
其道明文雖未至無害乎
其傳也其道未明文雖至

心

無益乎其傳也韓非商鞅
呂不韋之徒其文奇矣其
道則非莊周列禦寇楊雄
王通於道似有得矣而其
文爲弔詭爲艱深爲僭妄

均非其至者自周秦以降
上下數千年間文至而道
或不至焉有之道至而其
於文反不至焉無矣世之
惑者徒見前世之文傳以

爲學者文而已故愈勤而
愈不至方希直先生云求
學術于三代以後宋爲上
漢次之唐爲下所謂宋爲
上者指周程朱張四子言

也六經語孟之道得四子
而始大顯然自明至今士
之好周程張朱之文常不
勝夫好韓柳歐蘇王曾之
文者是可嘅已今夫韓柳

六君子之文至矣無以復
加矣然其文之所述有純
有駁有是有非固求道者
之所不可不講也講去其
非以存其是則道于此乎

在焉退之原道一篇漢唐
以來絕調也尊孔孟特至
其餘諸篇與子厚永叔輩
所引孔子孟子至與荀卿
屈原楊雄李斯並稱永叔

且先荀後孟晚年作本論
方知荀說之謬子由亦云
晚而始讀孟子然後縱觀
百氏而不亂先儒謂韓柳
諸君子知孔子不知孟子

蓋爲學而不知孟則其知
孔非真知也兩漢之文賈
董爲上退之絕口不道所
亟推者司馬相如太史公
班固耳其去取何偏也明

允以山林而談兵曰權書
曰衡論其命名已非至其
論諫則曰龍逢比于無儀
秦之術不獲稱良臣子瞻
以湯武爲篡弑以伊川爲

姦邪以荀或爲聖人之徒
安石上仁宗書曰先之以
征誅而後得意且援文王
孔子爲証而又以佛老爲
聖人諸如此類皆儒者所

不敢言亦不忍言蘇氏王
氏獨言之而不忘甚矣言
之難純也六君子且然而
况其下者苟徒取其文之
奇妙而不復議其理之是

非則是文自文而道自道
也其可乎夫韓柳六君子
之文未知孰與周程四子
之文嘗竊比之聖門顏子
未敢輕擬周程朱張庶幾

冉牛閔子善言德行者乎
韓柳歐蘇王曾則宰我子
貢善爲說辭也孔子曰以
言取人失之宰予又曰是
使賜多言也然則二子之

言亦孔子所不滿者乎尚
論有明之世其能爲古文
辭者不下千餘若其質之
程朱而不謬繩以韓歐而
不悖者吾得八人焉曰宋

景濂王子充方希直李賓
之王伯安王道思唐應德
歸熙甫之人君子者節義
事功俱未暇論觀其著書
無一言之不合于道者不


亦彬彬乎游夏之選與王
道思序應德文以應德比
子游當時未有非之者余
進八君子于游夏之列其
亦可無媿也嗚呼文之美

惡人之好惡存焉人之好
惡道之廢興寓焉余非故
抑韓柳六君子而揚宋王
八君子也道與文之所在
有不可誣者余又聞先儒

陸象山之言曰宰我子貢
其才智俱高游夏一等則
余於韓柳六君子未爲抑
也余豈好辯哉余不得已
也

晉江張汝瑚夏鍾氏撰

山



余於韓柳六吾千未

其十晉則高裁夏一筆

劉象山之言曰宰非千實

平 壹 餘 須 照 東

盛刻書林林行

宋文憲公集

晉王張夏重校主信要

康熙貳拾壹年

晉江張夏鍾先生評選

朱文憲先生集

溫陵書林梓行

序

古之言學術者必進攻其
師友之淵源與其鄉學之
統緒而後可尚論其人以
知其學之由來不可涯涘

也金華自呂成公之後歷
何王金許四先生代有文
人宋公景濂生于其鄉亦
旣美牆在望矣初受業立
夫吳氏之門旣復私淑正

傳吳氏子長張氏吳氏長
于經張氏長于史公兼二
氏之長更因許氏門人討
論道學之旨而究其極公
不亦恢恢有餘師哉當其

時婺有兩大儒待制柳公
道傳侍講黃公晉卿學者
尊爲北斗公負笈從之遊
兩先生辟呬詔之咸嘆服
公文以爲必當名世蓋公

之於師也取之若東海若
之蹄涔日乞而日不厭有
如此者嗚呼師道廢久矣
後世之士不能望見古人
之萬一者豈不以此歟公

起布衣遭遇明高皇拔居
禁職操觚秉制悉稱上旨
寵靈所被溥博汪洋前古
所未有也昔武帝之于司
馬相如神宗之於蘇軾徒

嘆賞其文耳史氏且艷之
若夫始稱爲君子終許爲
賢人高皇于公之外無聞
焉傳曰知臣莫若君信夫
公自以受知于上深精白

一心以承休德凡可以獻
替者咸無隱情上有所問
雖瑣屑必以實對嘗曰君
猶天也猶父也其可欺耶
夫君以恩逮下臣以誠事

上上下下之間交盡其道倚
歟休哉古之君子一時之
事業天爲之人不能期之
一代之文章人爲之天不
能限之公在朝十九年坐

論日久其績載旂常功施
社稷者更僕未易數當在
山中時詎意其有此耶至
于生平著作由其氣充而
學富遇觸卽發有叩必應

所爲主六經而奴百氏者
吾嘗操彼之柄以役之而
不受彼役蓋自公之文一
出而百世之上百世之下
無不在其範圍中嗚呼何

其盛也余又聞故元歐陽
文公之言曰余在翰林久
海內之文無不寓目者求
如宋君何其鮮也夫翰林
所讀者金匱石室之藏耳

廼至海內人士之士而
遍觀焉此其虛懷好道爲
可尚也余序公文旣遡其
師友之源流復美其君臣
之一德并述歐公之言如

此蓋欲使讀公文者得以
論其世庶幾有以得公之
實也

晉江張汝瑚夏鍾氏撰



宋文憲先生傳

溫陵後學張汝瑚纂

公姓宋氏名濂字景濂浦江人先世家金華之潛溪里公以扁所居不忘本也父文昭母陳氏姪七月而誕爲元至大庚戌十月十二日六歲入小學日誦二千言九歲能詩同里張繼之奇公因囑公父當令從名師父遣業于聞人夢吉先生學春秋輒能淹貫同郡胡君翰致書謂舉子業不足學盍學古文辭乎會吳貞文公某以古學主模範于白麟溪上公偕翰往從之遂博極經籍暢爲著作粹如也時柳文肅公貫

黃文獻公潛天下大儒公皆執弟子禮二人亦交譽
公自是名大著亡何四方盜起遯東明山自號龍門
子授徒講讀越二十年不出元至正己丑薦爲編脩
尋以親老辭歸著書二十四篇曰龍門凝道記及著
孝經新說周禮集註等書明太祖渡江定浙東遣使
者樊觀以書幣徵公庚子春三月公詣建康太祖喜
迎之曰我爲天下屈四先生蓋指公及青田劉公基
麗水葉公瑛龍泉章公溢也命坐咨時事聽經義置
禮賢館居之秋七月授提舉江南等處儒學冬十月
命授世子經公誠明儼恪遇綱常大義慷慨開陳不

倦太祖深嘉之壬寅秋八月召講春秋左氏傳公曰
春秋乃孔子褒善貶惡之書苟能遵行則賞罰適中
天下可定也已而歸省賜白金文綺癸卯平江漢獻
平江漢頌嘉瓜生於句容獻嘉瓜頌甲辰冬十月改
起居注乙巳春正月召見端門與論黃石公三略公
進曰尚書二典三謨帝王大經大法畢具願陛下畱
意上嘗語賞賚公曰天下以人心爲本苟得人心庫
藏雖竭無傷也人心不固雖有金帛何補於國耶未
幾病上數問起居因諭廷臣曰宋景濂誠篤無僞侍
予五年猶一日今命歸山中爰治疾愈速造朝國家

文翰庶有賴哉。璽以金幣，皇太子亦致贈。有加公旣歸，致表謝恩，復奉書皇太子，勉以仁孝恭敬，勤敏讀書，無懶惰無驕縱，進修德業，以副天下望。太祖覽書，甚悅，召太子諭以書意，御札荅公，侑之文綺，蓋異數也。洪武二年，詔徵公總脩元史。六月，除翰林學士，亞中大夫，知制誥，兼脩國史，時編摩之士皆辟山林布衣，發凡舉例一稟于公，同列斂手承命而已。逾年，書成，公之功居多。云：會割符封功臣，召公宿大本堂議五等封爵。公歷舉漢唐以來故實，量其中而裁之，曰：此可法，彼不可法。討論至達旦，時甘露屢降，上問災。

祥之故對曰受命不於其天於其人休符不於其祥
于其仁上嘗言古帝王當晏安之餘多好神仙朕謂
國治民安心神恬康卽神仙對曰漢武帝好神仙而
方士至梁武帝好佛而異僧至使移此心以求賢天
下有不平乎三年坐議孔廟禮謫安遠令五年二月
召爲禮部主事十二月陞太子贊善大夫階如司業
時嗟乎公之忠誠彌久彌篤皇太子之敬禮始終不
少衰讀書至切于政教及前代興亡之故必拱手揚
言曰君國子民之道當如是不當如彼且推人情物
理以明其義皇太子歛容嘉納一則曰師父再則曰師曰

父蓋諭教若斯之隆也先是上問帝王宜讀何書公
請讀真德秀大學衍義上立取覽說之令大書揭兩
廡壁六年二月上御西廡賜各大臣坐令公講大學
衍義所引司馬遷論黃老事公講畢復言曰人主能
以義理養心則邪說不能侵興學校教民則禍亂無
由作刑罰非所先也噫若公者豈非傳所稱陳善閉
邪引君當道者乎七月陞侍講學士兼贊善大夫詔
公集歷代奸臣事爲辨奸錄分賜太子諸王又命序
祖訓纂大明日曆七年日曆成一百卷又擇言行之
大者爲寶訓五卷爲序上之公侍上久多所陳寘輒

諒不務文飾上喜曰卿可叅大政對曰臣無他長徒以文墨議論事上頓首力辭每燕見坐賜茶詢舊章講治道甚條析或命賦詩爲文必寓忠告嘗應制詠鷹令七舉足卽成有自古戒禽荒之言上忻然曰卿善諫然未嘗以語人至於應制之作亦不留藁上嘗問廷臣臧否公第言善者某某不及否者大書溫樹二字室中或問朝事指二字示之其慎密如此上嘗強公飲醉歡笑賦楚辭一章令侍臣咸賦醉學士歌曰後世知朕君臣同樂也九年除翰林學士承旨知制誥兼修國史上曰朕起布衣爲天子卿自草萊列

侍從爲開國文人之首世世與國同休不亦美乎令
太子選良馬賜公又爲良馬歌以賜時有上萬言疏
者上怒其迂衍欲加罪問群臣阿意者輒指其疏此
不敬此詆謗召公問對曰彼應詔上疏本效忠無他
上復覽疏顧有足采者召罵阿意者曰若等激吾怒
何異以膏沃火向非宋景濂幾不誤罪言者上嘗諭
廷臣曰古人太上爲聖其次爲賢爲君子若景濂事
朕十九年口無毀言身無飾行寵辱不驚始終無異
不謂君子人乎匪唯君子抑可謂賢矣十年致仕賜
緡綺御製文集太子贈衣二襲上曰朕最愼賞嘉卿

忠誠故以賜卿卿今年壽幾何曰六十八歲上曰藏
此綺三十二年作百歲衣公頓首謝公辭歲請一朝
是年九月入朝上延問公屢矣及至大喜日侍上盤
旋禁籩便殿侍食日晏始退上嘆曰純臣哉爾濂方
今四裔皆知卿名卿自愛歲暮辭還旣行數日上問
公子璘曰朕疇昔之夜夢爾父笑談若曩時璘曰非
陛下垂念臣父何以形之夢寐日本使奉勅請文獻
百金卻不受上問公對曰天朝侍從受小屬國金非
所以崇國體十三年冬孫慎坐法論死公罪且不測
太子力救得釋安置茂州十四年行至夔州卒年七

十三歲時洪武辛酉五月二十日也塋夔之蓮花池
歲久荒壞成化間四川巡按孫仁聞而憫之遶蜀府
承奉宋昌新作問域費白金千兩孫公向昌求塋公
昌卽許之獻王所置祀田均義舉也故公墳今在成
都府東門外云昔德中追謚文憲

明五大家姓氏

宋

諱

濂字景濂號濂溪金華人由徵聘

官翰林學士謚文憲

方

諱

孝孺字希直寧海人由薦辟官翰

林侍講學者稱爲正學先生

王

諱

慎中字道思號遵巖晉江人嘉靖

丙戌進士官叅政

唐

諱

順之字應德號荆川武進人嘉靖

已丑會元官大中丞謚襄文

歸諱有光字熙甫號震川崑山人隆慶
乙丑進士官太僕

王華川李西涯王陽明三先生集卽出

朱文憲先生集選目錄

卷之一

賦

奉制撰蟠桃核賦有序
控峒雪樵賦有序

頌

平江漢頌

膏露頌

嘉瓜頌

鳳陽府新鑄大鐘頌

擬晉武帝武功頌

表

進大明律表

卷之二

序

洪武聖政記序

太古正音序

洪武正韻序

春秋屬辭序

理學纂言序

革象新書序

篆韻集鈔序

重校漢隸字源序

曾助教文集序

徐教授文集序

白雲臺序

漢天師世家序

卷之三

序

皇明雅頌序

御賜甘露漿詩序

呂氏孝感詩序

桃花澗修禊詩序

劉兵部詩集序

林伯恭詩集序

劉母賢行詩集序

剡源集序

張侍講翠屏集序

馬先生歲遷集序

東軒集序

詹學士文集序

蘇平仲文集序

朱葵山文集序

卷之四

序

應制冬日詩序

重刻真觀政要序

景定諫疏序

孝經集善序

郭考功文集序

胡仲子文集序

擣散雜言序

林吏部使安南稿序

送天台陳廷學序

送東陽馬生序

送許時用還越中序

送徐大年還淳安序

嗣

卷之五

傳

竹溪逸民傳

抱甕子傳

白牛生傳

太白丈人傳

葉由庚傳

謝翱傳

張中傳

王冕傳

李疑傳

余左丞傳

鄭氏孝友傳

卷之六

傳

王先生小傳

葉秀發傳

杜環小傳

詹士龍小傳

孝子丘鐸傳

危孝子傳

瞿孝子傳

孫孝子傳

王貞婦傳

蔣貞婦傳
張義婦傳

卷之七

記

代祀高麗國山川記 遊荆塗二山記

渤泥入貢記

松風閣記

貞白堂記

平陽林氏祠學記

見山樓記

瑤芳樓記

觀心亭記

華川書舍記

蘭亭觴詠圖記

宋九賢遺像記

看松菴記

貞節堂記

太乙亥微記

卷之八

雜著

論

六經論

隋室興亡論

議

孔子廟堂議

治河議

說

河圖洛書說

解

七儒解

辯

孔子生卒辯

管子辯

老子辯

莊子辯

論

琴論

論頑

書事

書客言二首

卷之九

雜著

書

荅郡守聘五經師書 荅章秀才論詩書

疑荅呂相絕秦書

文

逐鷁文

文原

畫原

擬漢使諭郡國共擊邯鄲檄

題

題陳忠肅公跡文跋語後

題梁元帝畫職貢圖 題新修李鄴侯傳後

題天台陳獻肅公行狀後

題余廷心篆書後

題許先生古詩後

題越士餞行卷後

題恩斷江端元叟手跡後

題天台三節婦傳後

跋

恭跋御賜詩後

跋新刻孝經集註後

跋太古遺音

跋韓忠獻王所書義鶻行後

跋黃魯直書

跋張孟兼文豪序後

跋匡廬社圖

卷之十

雜著

燕書

難

顏率求鼎難

語

廣薛季昶對張柬之語

志

五洩山水志

錄

秦士錄

辭

思嬾人辭

雲中辭

蔣季高哀辭

諸暨方孝婦石表辭

贊

溟滓生贊

陸秀夫像贊

越國夫人練氏像贊

龍馬贊

銘

詩塚銘

銅雀瓦研銘

卷之十一

墓誌銘

故贈將仕佐郎禮部員外郎瞿府君墓誌銘

元隱君子東陽陳公先生鹿皮子墓誌銘

故詩人徐方舟墓銘 唐思誠墓銘

墓碣

故巾山處士林君墓碣銘

神道碑

故資善大夫廣西等處行中書省左丞方公神

道碑銘

碑

東丘郡侯花公墓碑

碑

淵穎先生碑

麗水陳孝女傳碑

宋文憲公集卷之一

金華宋

濂景濂著

晉江張汝瑚夏鍾選

賦

奉制撰蟠桃核賦

有序

洪武乙卯夏五月丁丑上御端門召翰林詞臣出示臣桃半核蓋元內庫所藏物也其長五寸廣四寸七分前刻西王母賜漢武核及宣和殿十字塗以金中繪龜鶴雲氣之象後鐫庚子年甲申月丁酉日記其字如前之數亦以金飾之所謂庚子實宣和二年字頗疑祐陵所書既奉

旨撰賦垂誠方來。臣濂謹按王母獻桃事。詳見張華博物志第八卷史補類。華言桃七枚大如彈丸。遺帝五。自食其二。以今核觀之。且十倍於彈丸。則其實之如斗可知矣。豈華出於傳聞而想像載之歟。抑其言足信而後之好事者假托傳會之歟。不然。漢武內傳所謂桃如鳧卵形圓而色青者。又果何如歟。復按蔡京所記。尚方有王母蟠桃核頗鉅。京嘗相祐陵。其見與今相符。事當可徵。然則傳志所載誠有不可信者歟。臣敢忘其固陋。撰賦一篇。俯伏丹陛以獻。初則極

其形容終則一歸於正其詞曰

炎漢六葉實惟武皇闡坤符握乾綱祀汾陰建竹宮
叶仁獸在郊赤芝薦房西海獻續弦之膠弱水來燕
卵之香慶諸福之畢集思騎龍於帝鄉幸靈桃之入
口傳僊種於下方想其瑤階露寒彤庭秋迥銀燭未
掩畫屏斜映啓承華之秘殿眄瑤池而神騁忽王母
今遙臨托青鳥以傳命鬱佳氣之葱籠覲芳姿之妍
靚於是玳席初延霞觴屢傳蘭辭吐兮襲人縹袂舉
今高騫紫雲之輜輶暫駐九微之燈火猶燃乃啓錦
幪乃濯翠簾乃出桃實獻于帝前味甘醇而如醴色

含腴以不乾。鸞刀割蜜。神液流泉。上滋華池。身輕欲
仙。將懷核而種之。斲上林之寒烟。王母微笑。塵世易
遷。儻花實之並見。歲屢閱於三千。唯紫府之列真。視
滄海於桑田。彼窺鳥牖之小兒。尚奚測夫幽玄。斯核
也。匪鑄而成。非陶而凝。籍五行之亭毒。資六氣以流
形。鄙瓠犀之脆薄。並玉質之堅貞。瓜之不入叩。則有
聲。知何年之中析。存半璧之晶熒。俯貼金盤。巢蓮之
龜。仰承玉露。常薦之栢。銳首聳兮。尖岑豐下。櫛吐火
切狹長也。今墜星衆。皺蹙背文之籀。一窪暈面色之
頰。荷盤欲展。蚌甲未扃。藏仁之跡。猶在含肌之罅。如

生○函○肉○好○之○隱○約○圍○合○線○之○交○層○龜○鶴○軒○翥○兮○顯○象○
寶○章○絢○爛○兮○金○明○鳳○卣○鸞○彝○同○藏○真○於○天○府○星○形○月○
魄○挾○灝○氣○於○蓬○瀛○嗟○夫○自○昔○仙○靈○惚○恍○難○憑○出○無○入○
有○變○幻○莫○停○橘○類○益○兮○巴○園○棗○如○瓜○兮○漢○庭○恣○燕○齊○
之○方○士○騁○詭○辨○之○奔○騰○瞻○雲○路○之○咫○尺○恨○凡○骨○之○難○
登○以○雄○才○之○蓋○世○甘○昏○溺○而○不○醒○至○若○建○章○月○淡○甘○
泉○風○冷○銅○莖○中○峙○仙○掌○高○擎○望○飄○輪○兮○不○來○徒○馳○情○
於○窈○冥○苦○白○日○之○易○短○兮○竟○莫○制○於○頽○齡○核○雖○存○而○
人○則○逝○兮○悲○秋○風○於○茂○陵○矧○宣○和○之○繼○軌○兮○慕○鼎○湖○
之○龍○升○托○青○華○之○帝○子○設○神○霄○之○玄○稱○何○殷○鑒○之○不○

遠踵覆轍其相仍。天啓皇明。真人龍興。順堪輿之大
化。調陰陽之至精。道德行兮。卽龍虎之丹顯。忠信昭
兮。勝鉛汞之功弘。以九州爲仁壽之域。儕兆民於喬
松之朋。神機流浹。太和薰蒸。指佞人兮。草土不
氣朔兮。階秀堯蓂。視區區之遺核。初何繫乎。重輕此
所以革。往古之荒唐。法唐虞以作程也。許曰。桃有核
兮。大逾掌。歷千齡兮。多惚恍。旣靈仙兮。勞夢思。誰見
崑丘兮。紫芝長。真人出兮。海寓寧。禮樂爲冠兮。仁
義作纓。簫韶九成兮。鳳凰鳴。青鳥不敢徠兮。幻說清
千秋萬歲兮。永長生。

竊記徽宗本紀宣和元年己亥二月庚辰改元
遂易宣和殿爲保和殿至四年壬寅夏四月丙
午詔錄三館書置宣和殿及太清樓秘閣始重
稱宣和今核上之字刻于二年庚子之甲申月
乃不書保和而猶襲宣和之名此固不可不疑
况丁酉日屬庚子歲癸未月之終今復隸之於
甲申月之首尤有不可得而致詰者頗意此核
非漢武時物字亦非宋祐陵所書雜書所載海
外之國多大桃雖不可盡信或者得其遺核特
依倣而托之者歟然濂年已邁舊學皆廢忘未

必其言之足徵也。姑書之於此。以俟後之君子云。

夏鍾曰。蟠桃核奇矣。然而幻也。初極形容。終歸於正。詞人之賦麗。以則其斯之謂歟。

崆峒雪樵賦

有序

劉君宗弼。家于贛之空同山陽。學贍而文雄。嘗擢進士第。入教成均。出任浙江部使者之寄。聲光已赫然矣。君乃退然弗居。方以崆峒雪樵自號。其殆顯幽一致者歟。非賢而有德者。蓋弗能也。君間請濂賦其事。雕蟲篆刻之學。老且忘去。黽勉操觚。雖用賦體。而比物成義爲多。君之西

還或歌於清泉白石間。山靈聞之。未必不輾然一笑也。其辭曰。

伊空同之拔起兮。鎮嶠南之靈區。翠旂續其蕩空兮。播灝氣之蕤綏。章貢挾以比流兮。盎土脉之滋腴。穴遙通於龍翁兮。勢蟠亘於鬱孤。信地維之奧宅兮。爲靈真之所都。則有白鵝羽人。黃唐丹士。闢玉爲房。鑄金成黍。仰帝青之布帷。撥赤霞而啓筭。悼下土之全濁。凌剛風以逕度。惟彭城之僊子兮。式爛柯之遺軌。謂靈奕之可觀兮。意翩翩而遐舉。裘翦鹿肥之花屨。約芝田之葢巾。割湘雲之枝輦。點彩鷗之尾。傷胡麻。

之未飯愛白石之堪煮。踰洞真之石扉。借修月之寶
斧。期緱生之下臨。兮庶綠文之可受。于時玄冬屆朔。
氣交水腹。堅金莖高二鶴。夜語獨烏。晝韜莽六花之
聚白。合溟淖於空寥。幻九清之秘景。闕太素之神苞。
奪人目精。兮若流水翻空。而不一白。無定地兮如
爛銀炫耀於霜皐。瓊林玉樹。疊穎聯條。柯頓亡於春
綠。藹巧綴於晴稍。乃陟瑤磴。乃依氷樾。膚中寒而生
鱗。指屢僵而弗屈。丁丁許許。不遺餘力。已枯成采。方
長不折。玉屑隨聲而輕墮。霜莖倚雲而初積。束以九
真之赤藤。附以千年之苓朮。既逍遙而永歸。忘蕉鹿

於今昔歌曰我采我樵兮大濛之野萬樹龍璽兮玉
光照夜孰能相從兮與霓旌而俱下於是築石竈繡
金經養神火煉黃寧永生水虎之窟鉛出火龍之局
液承太乙之珠璣運元華之精憑乾坤之卦券植鄴
鄂之丹城逮伐毛而洗髓致陰爍而陽凝種芝於瓊
玉之山折桂於廣寒之庭領衿佩於橋門集鷁鷺於
主庭白簡霜飛繡衣春明近一山而持斧使九夏之
生冰廼乘風而來歸兮於瀛洲之先登隔人間之風
雨兮遽真凡之異程至若西隣之子沈酣羶葷屏龜
香曙笙火花春葆階舞楚銀館歌秦黃塵迷南華之

夢弊屣。啗東郭之貧。樂鍾鼎之遺。豔厭烟霞之近。醇
尚父釣渭。阿衡耕莘。或封齊於東海。或致君於華勛。
齊出處於一塗。旨變志於屈伸。世繽紛兮麗以新。蠟
代薪兮傷芳辰。翻海水以爲霖兮。曾莫濯夫游塵。孰
不化爲胡燕兮。依華棖之飛文。丹禽鳴夫空谷兮。亦
寥寥之一聞。彈樵歌之逸響兮。寄綠綺於秋旻。歌曰。
若有人兮。在蘭厓止。白虎爲使。陟崇巘止。皓毛迴颿。
敷天葩止。虛白內朗。絕纖瑕止。仁斧義戕。龍鏘鳴止。
鵜膏匪施。痂弗形止。剪彼薪樗。扶松栢止。養賢大鼎。
熟以烹止。天下爲公。大道行止。邈風屹立。思盈盈止。

亮集卷之一

十一

目一學之於專文展古藝典藉之歸
夏戰日涉矣孤升事類收諸掌而歸

頌

平江漢頌

天命皇上爲億兆生民主旌麾所向悉臣悉庭初以
軍旅之師興濠泗間遂撫淮南平江東攻浙東西下
之版圖所入方數千里定都江左發政施仁戴白之
叟垂髫之童涵泳至化皞皞熙熙如承平時于時陳
友諒據有江漢之地僭居大號賊殺其主大修蒙衝
虐驅烝黎如蹈水火不自度力又集蜂蟻之衆直庖
豫章三月不解皇赫斯怒乃召群臣于庭而告之曰
友諒不道敢屢予侮昔者蕩搖我邊方侵軼我姑孰

伺偵

耻慶切
候也

我金陵。賴爾一二臣隣之力。攻而敗之。

予亦親覆其穴。巢中宵竄。走假息武昌。予不忍追殲之。冀其悔禍。以自逭於天刑。癸卯之夏。乃復圍我豫章。是其凶德無厭。自取殄滅。此天亡之時。天之明威。予不敢不順。唯爾熊羆之臣。不二心之士。尚弼予以成厥功。群臣曰都。於是右丞臣達。參知政事臣遇春。帳前親兵指揮使臣國勝。同知樞密院事臣永忠。臣通海。備厥戎器。簡厥師徒。以俟。七月癸酉。上躬擐甲。冒禡也。師祭纛。龍江。帥樓船數百。蔽江而上。友諒大營解圍而逃。丁亥。與我師遇鄱陽湖之康郎山。戊子。上

分舟師爲十二屯。命達遇春永忠突入敵陣。呼聲動
天地。矢鋒雨集。砲聲雷鉤。波濤起立。飛火照耀百里
之內。水色盡赤。焚溺死者動一二萬。流屍如蟻。滿望
無際。己丑。焚僞平章舟。刈戮餘二千。辛卯。復酣戰。敵
將張定邊素號梟猛。上親禦之。將士皆死戰。歷一二
時。遇春等左右夾擊。殺士卒無筭。張中矢百餘而退。
潛保鞋山。不敢吐氣。我師亦據湖口。扼彼喉衿。列柵
南北。江岸置火筏中流。水陸嚴戒。以候其發。八月。敵
食盡。遣舟五百艘掠糧都昌。又爲我大將所獲。壬戌。
敵計窮。冒死突出。將上趨九江。上命諸將一時俱合。

其大戰如戊子自辰達酉督戰益急友諒中飛矢斃
于舟中癸亥降其衆五萬上命釋之不戮一人凱歌
而旋舳艫相銜旌旗飛翻不疾不徐委蛇而來萬姓
歡迎俯伏道左山川草木皆有喜色告廟飲至行賞
論功賜遇春田若干永忠田若干其餘將士資金繒
有差臣稽在昔曹操治水軍八十萬來攻孫權而周
瑜黃蓋敗之於赤壁符堅發長安戎卒六十餘萬騎
二十七萬以侵晉而謝琰謝石敗之於淝水然赤壁
不過一焚而走淝水亦不過軍亂而奔初未嘗大戰
也而史臣具書之以爲千古美談矧今湖口之捷血

戰累日。天地爲之晦冥。日月爲之無光。山河爲之震盪。其神功駿烈。炳耀鏗鉤。與天無極。較之三國未足多。讓而歌咏不作。非甚闕典歟。臣謹備著其事。撰爲詞頌一通。以流鴻績於無窮。以俟太史氏之采錄云。其詞曰。天眷有德。實爲哲皇。肆其神畧。以靖寇攘。義旄東指。罔敢弗恭。風烈虎嘯。雲游龍驤。長淮旣歸。江左攸屬。浙之東西。樹侯置牧。乃建國家。以奠南服。以懷中原。以控西蜀。蠢爾小醜。敢讎大邦。集其兇頑。鋒蝟斧螳。輕涉我疆。以跳以踉。亦旣剪刈。僵骸覆江。洊齊六軍。直傾其穴。釋而勿誅。俾自懲刷。闔胡不然。復

豕而噬。翹其蟲臂。當吾車轍。皇明震怒。歷告在廷。是
決不悛。命將往征。爾選舟師。爾整甲兵。漕爾糗糧。各
罄爾誠。搖光在中。夷則之月。禡牙江濱。皇秉鉞以
誓。以戒。以速。其發紀律精明。颺火奮激。旟旐揚揚。解
漢江。艘將將。矛戈洸洸。鎧胄明明。載怒載厲。載飛載
颺。雄威所吞。已無荆湘。旣與敵逢。大呼衝擊。藥騰藜
駭。星流火戟。虐燄電奔。巨轟雷劈。殺氣冥蒙。不辨咫尺。
矢鋒所貫。什伍聯聯。縱橫交紐。命隕弗顛。橫梃湊
颺。笥東蜩編。流尸塞川。舟行弗前。敵魄旣褊。扶創而
逸。聚于湖奧。僅存喘息。我方植柵。江之南北。火筏在

流掩蔽如翼。越歷四旬。飛走途窮。將冒萬死。以絕其
衝。我師見之。千艦如龍。似兔之走。而鷹之從。酣戰六
時。由辰達酉。僕姑矢名也一發。殪此戎首。貫睛及顙。仆
若枯柳。大憝既除。餘不能醜。遁相告言。我誠不振。我
革我頑。我歸至仁。誰謂培塿。可高嶙峋。再拜稽首。來
降來臣。皇曰。俞哉。汝俘予受宥。汝弗劉予。汝父母汝
瘝予。衣汝飢予。哺昔何昏迷。今始撤部。奏凱而旋。騎
吹鬱搖。形於樂歌。節以鐃鐃。飲至于廟。頒賞于朝。帛
堆其家。肉登其庖。都人聚觀。舉手加額。或嘆或謠。有
聲噴噴。干戈相尋。匪一朝夕。自今昇平。可坐而笑。惟

皇○神○武○動○則○克○之○群○策○盡○屈○四○方○式○之○惟○皇○寬○慈○降○
則○釋○之○義○聲○動○盪○疇○能○敵○之○惟○皇○明○斷○遇○事○卽○決○洞○
見○千○里○不○隔○一○髮○所○以○四○征○成○此○駿○烈○小○大○畢○朝○孰○
敢○肆○孽○在○昔○赤○堊○洎○乎○合○淝○事○以○幸○集○尚○傳○策○書○况○
茲○之○功○俊○偉○赫○燾○揆○古○無○讓○可○無○咏○詩○臣○雖○微○賤○文○
字○是○職○對○揚○皇○休○并○獻○臣○臆○三○代○以○還○用○仁○興○國○皇○
宜○遵○行○永○作○民○極○

夏鍾曰鄱陽一戰開創首
功頌與昌黎平淮頌頌矣

膏露頌

洪武二年冬十月十有三日
成膏露降于乾清宮

後苑蒼穆之上皇帝勅中官折示禁林諸臣光潤如
酒凝結如珠昉白飴甘彌布松柯馨烈之氣鬯達左
右勃鬱淋漓薰涵太龢天休震動中外嘆嗟又明日
丙子上御外朝左丞相宣國公臣善長帥群臣稱賀
上若曰甘露之降載在往謨然休咎之徵當以類應
朕惡足以致斯卿等尚明爲朕言之叅知政事臣稼
對曰聖人之德上及太清下及太寧中及萬靈則膏
露呈瑞陛下敬恭天地輯和人民故天不愛道而嘉
祥徽顯也起居注臣觀對曰帝王恩及於物順於人
而甘露降陛下誕寬民賦衆庶驩豫底于敎寧神應

之臻職此故也。翰林侍講學士臣素對曰：王者敬養耆老，則甘露降而松柏受之尊賢容衆，則竹葦受之。今露降于松，則陛下養老之所致也。宜以制幣策告宗廟，頒於史館，以永億萬年無疆之聞。上情存損挹，皆推而不居。言旣已，丞相帥其班以退。翰林學士臣濂竊伏自念：氏北有星名爲天乳，若明而潤則膏露下焉。王者德各於上，恩覃於下，靈氛充牣，秘貺斯甄。此天人感應之常理也。欽惟皇上興自臨濠，匹馬渡江，十五年間遂成帝業。天瑞育滋，不一而足。彩霞成鳳，鄉雲聚繡。赤鳥飛翔，白兔俯伏。瑞連並萃，嘉木

孕文實皆天之所命。非人力所致而自至者。今又觀
茲聖徵。則其德洞淪。冥功成不宰。三瑞沓至。于休滋
彰。有不期然而然者矣。雖然。傳有之。受命不于天。于
其人。休符不于祥。于其仁。所以孔子之作春秋。祥瑞
不書。而有年則書。豈不邇求遠難知。而人事之
爲可徵者乎。皇上以天縱之聖。靈神至治。以得仁賢
爲瑞。以五風十雨爲祥。視彼前代。植金莖以承液。夸
嘉瑞以紀年者。未嘗不指以爲戒。則其英明之識。超
絕之智。卓冠百王。爲法萬世。是宜美盛德之形容。播
諸樂歌。被之管絃。以示聖子神孫於無窮云。其辭曰。

上天降康。甘露之襲。於衆其英。純乾發自陽。以布
於下方。凝於休祥。其祥伊何。靈氣孔多。有甘者液。載
仁惟澤。潛靈是錫。誕啓皇之德。天地相合。鴻休翕集。
厭厭浥浥。紛紛密密。匪隨日以食。兆厥聖徵。如卿之
雲。如景之星。如日之重輪。冲和氤氲。以文我太平。惟
皇之聖。貞符自應。不卑而泳。不高而迎。弗祿之攸盛。
惟皇之明。貞符爾承。不欹而傾。不汰而盈。弗祿之攸
寧。休慶之卽。四國之式。有濯厥聲。耀于千齡。

夏鍾曰引對精詳蒼然之色鏗然之聲

嘉瓜頌

皇明式于九圍。德漸仁被和氣。薰蒸靈物效祥。乃洪武五年夏六月。嘉瓜生于句容張觀之園。雙實同蒂。圓如合璧。奇姿分輝。紺色交潤。誠爲曠世之產。壬寅京尹臣遇林。函以素甌。圖其形于上。移文儀曹。請以奏聞。癸卯尚書臣凱等。奉瓜以獻。時上御武樓。中書右丞相臣廣洋。左丞臣庸。同知大都督府事臣英。御史中丞臣寧。翰林學士臣濂。咸侍左右。天顏怡愉。重瞳屢回。良久乃言曰。徵之往牒。其事云何。丞相奏言。漢元和中。嘉瓜生于郡國。唐汴州亦獻嘉瓜。禎祥之應。有自來矣。陛下勵精圖治。超漢軼唐。故天錫之珍。

符太平有象。實見于茲。上謙讓弗居。然而靈祝之臻。復不可不承。乃詔內臣。寘諸乾清宮。翌日甲辰。薦諸太廟。臣濂退而思之。夫瓜蒌力果切草實在地生之屬也。其蔓遠引。其葉阜蕃。諸傳有之。神瓜合形。表繇繇之慶。此固兆聖子神孫。享億萬載無疆之祉。况瓜之所出。本於回紇。中國討而獲之。故名爲西方。今皇上命大將軍。統師西征。甘肅西涼諸郡俱下。而瓜沙已入職方。行見西域三十六國。同心來朝。駢肩入貢。天顯叶瑞。其又不在於茲乎。然而異畝同穎。周公作歸禾之篇。三秀合圖。班氏有靈芝之歌。矧此嘉植。含滋發馨。昭

宣我神應。焜煌我王度。寧可啐

於金於甘切帝極無聲

默而遂

已乎。顧臣駑劣。不足以美盛德之形容。謹上其事。願

宣付史館。以備實錄。復繫之以頌。頌曰。乾道載清。

坤維用寧。保合太和。發爲休禎。句容之墟。物無疵癘。

神瓜挺出。殊實同蒂。瓜孰非單。此合而生。二氣毓質。

雙星降精。蜜房均甘。冰圭競美。明月重輪。彷彿堪象。

豈無賓連。產於戶東。叶疇若茲瓜。協瑞聯祥。亦有華

平。張翠作蓋。疇若茲瓜。交輝映彩。其兆伊何。蘿圖繇

迺。西域旣柔。德冒八埏。群臣曰都。載拜稽首。神休滋

彰。天子萬壽。粵從啓運。靈貺疊甄。兩岐麥秀。合相無方

切花孕蓮矧此貞符近在輦轂王化自邇遠無不服
帝曰吁哉朕猶慊然瑞當在人物胡得專使物爲祥
宜獻清廟自我先人積慶所召孰瑞不矜帝則弗居
唯親是思我民之徒以實應天斯乃盛德小臣作頌
以示罔極

夏鍾曰典麗弘
聖神采續紛

鳳陽府新鑄大鐘頌

皇帝旣正大統建都江表德綏威讐萬邦咸臣用群
臣奏臨濠爲龍飛之地賜名曰鳳陽南北民大和會
百族錯居動十萬數然而物大而盛不假器齊一之

無以嚴昏旦之禁。乃詔江陰侯吳良監鑄大鐘。以定衆志。以裨治化。侯之受詔。遣使者至富春山中。徵金工。何成。諭以天子明命。卽日帥其屬十六人以從。相地鳳陽城東三里。搏泥成範。畫其銑角衡之度。倭弁爲良篆帶。以方候其燥剛。始穿一十又三鍊。青赤銅六萬五千斤。筮以洪武乙卯冬十一月己巳蒞事。厥明。侯具法服。以牛一羊一豕一。祝告先冶之神。禮旣成。橐籥咸興。鼓動風氣。炎光赫曦。土貫霄漢。絳液旣澄。氣憤雲洩。循竇而入。肅肅有聲。陽施陰凝。勁質斯具。越二日辛未。乃發。復取牲血塗其罅隙。以厭除不

祥鐘高十六尺有五寸、厚六寸、徑十尺有五寸、圍三十四尺有奇、混融其淪、圓煒燁其容、輝信技殫於人、巧妙奪於神功者也。於是營構層臺、副以篋簏、聚千夫之力、鉅絙而登之、一杵之撞、隱隱闐闐、雷旋電奔、震撼太虛、遐邇聞者、靡不聳愕。會濂扈從青宮、幸鳳陽、親觀盛美、侯遂請濂爲之頌。濂聞先王之世、金部有七、黃鐘乃樂之所自出、而景鐘又爲黃鐘之本、所謂景鐘、大鐘也。其受至於九斛而止、律呂由是而應、陰陽由是而均。夫豈細故也哉。秦漢以來、喪失古法、十鐘或數尺、大鐘或容千石、皆不本於律、失鐘以定

明稽古右文。定於中制。宣導天地。孚洽神人。中和所
致。嘉瑞畢協。增拓化原。亦於是乎有賴。非特嚴昏旦
之禁而已。濂待罪國史。以文辭爲職業。義當發揚蹈
厲。以鳴國家之盛。侯之有請。不敢固辭。頌曰。維天
穆清。鼓以雷霆。適昭天聲。百物以生。維帝濬哲。法天
之烈。大鏞斯揭。元氣噴洩。睠于濠梁。真龍飛翔。乘陰
御陽。蹠濯入荒。神物攸起。是爲帝里。從者如雨。於焉
萃止。物大而豐。往來憧憧。節之以鏞。罔敢弗恭。乃飭
鳧氏。乃具爐錘。乃烹乃鬻。化金爲水。赤氣夜明。如日
之昇。流亟而賴。人竇有聲。彬彬斐斐。功同神鬼。不鈕

不。錫。輪。圓。順。軌。既。啓。其。型。敢。愛。斯。牲。塗。釁。禮。成。榮。光。
如。星。千。夫。齊。力。臺。構。懸。植。交。扛。孔。奭。載。考。載。擊。宅。今。
困。困。觸。兮。賁。賁。摩。乾。盪。坤。以。警。昕。昏。發。攄。靈。氣。昭。融。
品。彙。物。無。疵。癘。年。穀。攸。遂。博。碩。而。龐。聲。與。天。通。拓。美。
集。祥。熏。于。家。邦。惟。皇。建。極。福。之。敷。錫。制。器。有。赫。式。和。
民。則。稽。樂。之。原。鐘。實。爲。先。律。呂。以。宣。功。垂。不。刊。小。臣。
作。頌。有。美。無。諷。爰。咨。于。衆。是。傳。是。誦。

夏鍾曰左健蒼蔚雕
縷字句悉屬匠心

擬晉武帝武功頌

惟咸寧五年冬十有一月皇帝將舉兵徂征乃集多

士于庭而訓之曰。惟皇天孚佑有晉。俾克君臨萬方。爾萬方有衆。罔敢有肆厥志。朕猶夙夜祇懼。若將墜于深淵。唯恐一夫不獲。以越前王彝憲。商書曰。民非后。罔克胥匡以生。后非民。罔以辟四方。朕曷敢荒寧。今孫氏皓舍我民弗靖。唯酒暨色淫酗無厭。大開苑囿。起土山樓觀。殫極工藝。肆厥威如虎狼。群臣有正視者。輒殺無赦。人怨神怒。皓有耳。若罔聞知。則亦弗畏。天降威命。上帝震怒。集厥命于朕躬。不敢不正。敢用吉玉宣璧。昭告于天神后。帥爾有衆。底天之罰。爾仲爾爲王子。國之休戚。與爾同之。爾督徐州諸軍。

以出涂中。爾渾。戮力王室。簡在朕心。爾督揚州諸軍。
以出大江之西。爾預。夙以嘉謨告朕。朕極不忘。爾尚。
克踐前言。以成厥勲。荊州諸軍。爾其督之。以出江陵。
爾濬。爾作大艦。欲有事於皓。多歷年所。今維其時。非。
爾弗克。終厥圖。益梁諸軍。爾其監之。以下巴蜀。爾彬。
帥其部曲。以從爾奮。爾戎。世號忠貞。各將爾師。以出。
夏口。以出武昌。爾克。爲使持節。假黃鉞。大都督。以冠。
軍。爾濟。副之。嗚呼。爾有衆。修乃干戈。峙乃糗糧。齊乃。
士伍。勿喪厥紀律。惟爾賢。往敷朕威靈。越厥君臣。宜。
執俘之獻于太廟。勿大肆殺戮。惟爾賢。嗚呼。朕豈有。

愛于皓土疆。閔我民罹辜。誕以爾多方。殄殲乃讎。爾
尚兢兢懷保。若撫穀雛。兵戎所指。弗使致厥傷。俾朕
膏澤布於下民。時乃功。爾不聽朕言。朕則孥戮女。爾
其念哉。太康九年春。安東將軍渾出橫江。所向皆克。
二月。龍驤將軍濬克西陵。鎮南大將軍預遣將渡江。
自進克江陵。沅湘以南諸郡皆望風送印綬。預分兵
益濬。建威將軍戎遣將與濬合攻武昌。降之。三月。濬
以舟師入石頭。皓面縛與覲。詣軍門降。克州四郡四
十三戶。五十二萬三千兵。二十三萬。夏四月。賜皓爵
歸命侯。遣使行荆楊。除皓苛政。詔增克渾邑八千戶。

進渾爵爲公。濬輔國大將軍。預戎皆封縣侯。諸將賞
賜有差。以伐皓之役。實始於鉅平侯祐。祐旣卒。策告
其廟。封其夫人爲萬歲鄉君。食邑五千戶。復詔博士
臣某刻石紀功。昭示萬世子孫。以紹有晉無窮之基。
弗敢壞。頌曰。煌煌有晉。寵綏下民。欲俾萬方均固。
至仁。惟皓不恭。據彼海瀕。殘虐是逞。若火四焚。帝怒
斯赫。命將徂征。龍盾虎旗。照耀日星。士氣如虹。吞厥
南土。長江天塹。一朝飛渡。罔不震驚。流汗浹背。伊
神武自天而墜。帝命將臣。汝戒汝師。汝敵則劉。降宜
舍之。皓旣面縛。餘敢不釋。萬里雖遠。天威咫尺。青蓋

委蛇入于洛中。夙發其祥。昭此武功。皇華載遣。六轡
耳耳。誕布陽和。以消陰殪。旋乾轉坤。六合一家。文恬
武嬉。渾渾無涯。有功者賞。載盼載錫。赤芾桓圭。帝不
之惜。惟帝神武。能屈羣策。拓開蠻荒。揭此日月。帝德
流衍。頌聲斯播。授之樂師。以薦郊廟。

夏鍾曰擬古作命將出師
星羅碁布直如身履其地

宋文憲集卷之一

三

表

進大明律表

臣聞天生烝民○莫不有欲○欲動情勝○詭僞日滋○強暴
縱其侵陵○柔懦無以自立○故聖人者出○因時制治○設
刑憲以爲之防○欲使惡者知懼○而善者獲寧○傳所謂
獄者○萬民之命○所以禁暴止邪○養育群生者也○譬諸
禾黍○必刈稂莠○而後苗始茂○方於白粲○必去沙礫○而
後食可食○苟梗化敗俗之徒○不有以誅之○雖堯舜不
能以爲治○夫自軒轅以來○代有刑官○而五刑之法漸
著○其詳弗可復知○逮魏文侯師於李悝○始采諸國刑

典造法經六篇。漢蕭何加以三篇。通號九章。曹魏劉劭又衍漢律爲十八篇。晉賈克又參魏律爲二十篇。唐長孫無忌等又取漢魏晉三家擇可行者定爲十二篇。大槩皆以九章爲宗。歷代之律至於唐亦可謂集厥大成矣。洪惟皇帝陛下受億兆君師之命。登大寶位。保乂臣民。孳孳弗怠。其訓迪羣臣。諄復數千言。雖其有犯慈愛仁厚之意。每見於言外。是大舜惟出閭天之義也。矜憫愚民無知。陷于罪戾。法司奏讞。輒惻然弗寧。多所寬宥。是神禹見辜而泣之心也。唯臺之吏承踵元弊。不異白粲中之沙礫。禾黍中之

稂莠也。乃不得已。假峻法以繩之。是以臨御以來。屢
詔大臣更定新律。至五六而弗倦者。凡欲生斯民也。
今又特敕刑部尚書劉惟謙重會衆律以協厥中。而
近代比例之繁。姦吏可資爲出入者。咸痛革之。每一
篇成。輒繕書上奏。揭於西廡之壁。親御翰墨爲之裁
定。由是仰見陛下仁民愛物之心。與虞夏帝王同一
哀矜也。易曰。山上有火。旅。君子以明慎用刑而不留
獄。言獄不可不謹也。書曰。刑期于無刑。言辟以止辟
而民自不敢犯也。陛下聖慮淵深。上稽天理。下揆人
情。成此百代之準繩。實有易書之奧旨。行見好生之


德洽于民心。凡日月所照。霜露所墜。有血氣者。莫不
上承神化。改過遷善。而悉臻雍熙之治矣。何其盛哉。
臣惟謙以洪武六年冬十一月受詔。明年二月書成。
篇目一準之於唐。曰名例。曰衛禁。曰職制。曰戶婚。曰
廩庫。曰擅典。曰賊盜。曰鬪訟。曰詐僞。曰雜律。曰捕亡。
曰斷獄。采用已頒舊律二百八十八條。續律百二十
八條。舊令改律三十六條。因事制律三十一條。擬唐
律以補遺一百二十三條。合六百有六。分爲三十卷。
其間或損或益。或仍其舊。務合重輕之宜。云謹俯伏
闕廷。投進奉表以聞。臣等誠惶誠懼稽首頓首。謹言。

夏鍾曰宦途炎熱中歌此
賦一闕何啻一帖清涼散

利文憲集

卷之一

三



宋文憲集卷之二

金華宋

濂景濂著

晉江張汝瑚夏鍾選

序

洪武聖政記序

自古帝王創業垂統。方有事于征伐。而於彌綸天下之治具。勢或未遑。及其大統既集。亦不過振厥宏綱。而萬目未盡舉焉。如漢之高帝。得國最正。雖曰筭無遺策。而施之政令。猶乏精詳。故史臣贊之。亦但云規模宏遠而已。夫以高帝之雄傑。尚如此。則其餘從可知矣。洪惟皇上。以布衣受天命。蓋與高帝同。雖當開

拓土疆之際。停戈講藝。息馬論道。夜以繼日。無一時之寧。迨夫正天位。朝萬國。孳孳圖治。恒若不足。於是綱舉于上。目備於下。誠有非高帝所可及。是故郊廟以及百神之祭。禮文咸秩。則祀事嚴矣。御極之日。卽立儲位。以正青宮。則大本定矣。衆建諸王。列封功臣。則大分昭矣。兵戎之衆。自京師達于郡府。率皆設衛。權一出於朝廷。而爲將者不得私。而軍政肅矣。內外官有定制。一革冗濫之弊。而倖位絕矣。冠服有別。防範有體。而民志自定。無僭侈矣。他如申禁令。覈實效。育人才。優前代。儀之失去。海嶽之封。嚴宮壺之

法勵忠節之訓。刻積歲之。如斯之類。不一而足。或前王所未得。或行之有未至者。皆煥然有條。可以垂法。後世此其故何哉。蓋自近代以來。習俗圯壞。將及百年。而天生大有爲之君。首出庶物。一新舊染之俗。與民更始。是故睿思所斷。動契典則。度越千古。咸無與讓。此正所謂錫勇智而正萬邦也。臣備位詞林。以文字爲職業。親見盛德大業。日新月著。於是與僚屬謀取其有關政要者。編集成書。列爲上下卷。凡七類。合若干條。名曰洪武聖政記。然而天之高明也。萬物莫不覆焉。地之博厚也。萬物無不載焉。聖人之作也。

萬物咸興欣覩焉。故凡金科之頒。玉條之列。著之於簡書。刻之於琬琰。傳之於聖子神孫者。將與天地相爲無窮。書曰。惟天聰明。惟聖時憲。詩曰。詒厥孫謀。以燕翼子。此之謂矣。其所以致四海雍熙之治。比隆於唐虞三代者。豈不在於茲乎。豈不在於茲乎。臣不佞。請以是序于篇端。極知僭踰。無任隕越之至。洪武八年歲次乙卯正月甲子。翰林侍講學士中順大夫知制誥同修國史兼太子贊善大夫臣宋濂拜手稽首謹序。

夏鍾曰。明太祖創制顯庸。創曰張漢唐開創之。君不能逮。不特得國之正已也。此序極力敷揚。雖

臣子之體然字字實錄不得謂之貢諛

太古正音序

余少時則學琴。嘗學之。而患無善師。與之相講說。雖時按書布爪。滌堙鬱。而暢懣憤。心弗自是也。後聞冷君起敬。以善琴名江南。當時學琴者皆趨其門。余尤慕之。以爲安得一聽。以償夙昔之好乎。及入國朝。余旣被命起仕。而冷君亦繼至。時天子方注意郊社宗廟之祀。病樂音之未復乎古。與一二儒臣圖所以更張之。冷君實奉明詔。定雅樂。而余預執筆製歌辭。獲數與冷君論辨。冷君閒抱琴爲余鼓數曲。余瞑目而

聽○之○悽○焉○而○秋○清○盎○焉○而○春○煦○寥○寥○乎○悲○鴻○吟○而○鶴○
鶴○鸞○鳳○追○而○和○之○也○硃○硃○乎○水○合○萬○壑○瀑○布○直○瀉○其○
上○而○松○桂○之○風○互○答○而○交○衝○也○懇○懇○乎○如○虞○夏○君○臣○
上○規○下○諷○而○不○傷○不○怒○也○熙○熙○乎○如○漢○文○之○時○天○下○
富○實○而○田○野○耆○耄○乘○車○曳○屣○嬉○遊○笑○語○弗○知○日○之○夕○
也○余○倦○爲○之○忘○寢○不○自○知○心○氣○之○平○神○情○之○適○閑○旬○
日○而○餘○音○繹○繹○在○耳○誠○知○其○美○欲○從○而○學○焉○而○余○已○
老○耄○不○可○勉○矣○旣○而○冷○君○出○其○所○次○琴○譜○曰○太○古○正○
音○者○示○余○且○曰○子○之○所○聞○者○皆○出○乎○此○所○未○聞○者○可○
按○譜○而○學○也○子○可○以○序○之○乎○余○有○感○焉○樂○之○爲○教○也○

大矣。古之人自非居喪服有異故則樂未嘗違乎左右。所以攝忿戾之氣通神明之德其助豈爲細哉。後世古樂寢久寢亡。今之所存若琴者無幾。士大夫又鮮能而寡聽之。雖如余之有志於學猶有耄老無聞之悔。況不若余之質固者乎。誠以有其器而無其譜。有其譜而其制不全故也。今冷君獨不自私其藝將使人人可按譜而學。豈非古人之用心哉。然余恐人見其易而忽之也。故道願學之意以見其爲術之難。述所聞者以告之。使人知冷君之用志於琴甚久。非特空言而已也。冷君名某某郡人。今爲協律郎。

夏鍾曰中一段描寫琴聲歷歷如出紙上令人神往

洪武正韻序

人之生也。則有聲。聲出而七音具焉。所謂七音者。牙舌唇齒喉及舌齒各半是也。智者察知之。分其清濁之倫。定爲角徵宮商羽。以至於半商半徵。而天下之音盡在是矣。然則音者。其韻書之權輿乎。夫單出爲聲。成文爲音。音則自然協和。不假勉強。而後成。虞廷之賡歌。康衢之民謠。姑未暇論。至如國風雅頌四詩。以位言之。則上自王公。下逮小夫賤隸。莫不有作。以人言之。其所居有南北東西之殊。故所發有剽疾重

遲之異。四方之音。萬有不同。孔子刪詩。皆堪被之絃。歌者取其音之協也。音之協。其自然之謂乎。不特此也。楚漢以來。離騷之辭。郊祀安世之歌。以及於魏晉諸作。曷嘗拘於一律。亦不過協比其音而已。自梁之沈約。拘以四聲八病。始分爲平上去入。號曰類譜。大抵多具音也。及唐以詩賦設科。益嚴聲律之禁。因禮部之掌貢舉。易名曰禮部韻畧。遂至毫髮弗敢違背。雖中經二三大儒。且謂承襲之久。不欲變更。縱有患其不通者。以不出於朝廷。學者亦未能盡信。唯武夷吳棫患之尤深。乃稽易詩書而下逮於近世。凡五十

家以爲補韻。新安朱熹據其說以協三百篇之音。識者雖或信之。而韻之行世者猶自若也。嗚呼。音韻之備。莫踰於四詩。詩乃孔子所刪。舍孔子弗之從而唯區區沈約之。是信不幾於大惑歟。恭惟皇上稽古右文。萬機之暇。親閱韻書。見其比類失倫。聲音乖舛。召詞臣論之。曰。韻學起於江左。殊失正音。有獨用當併爲通用者。如東冬清青之類。亦有一韻當析爲二韻者。如虞模麻遮之屬。如斯之類。不可枚舉。卿等當廣詢通音韻者。重刊定之。於是翰林侍講學士臣樂韶鳳。臣宋濂。待制臣王僎。修撰臣李叔允。編修臣朱右。

臣趙壘臣朱廉典簿臣瞿莊臣鄒孟達典籍臣孫黃
臣答祿與權欽遵明詔研精覃思壹以中原雅音爲
定復恐拘於方言無以達於上下質正於左御史大
夫臣汪廣洋右御史大夫臣陳寧御史中丞臣劉基
湖廣行省叅知政事臣陶凱凡六膽稿始克成編其
音諧韻協者併之否則析之義同字同而兩見者合
之舊避宋諱而不收者補之註釋則一依毛晃父子
之舊勒成一十六卷計七十六韻共若干萬言書奏
賜名曰洪武正韻勅臣濂爲之序臣濂竊惟司馬光
有云備萬物之體用者莫過於字包衆字之形聲者

莫過於韻。所謂三才之道。性命道德之奧。禮樂刑政之原。皆有繫於此。誠不可不慎也。古者之音。唯取諧協。故無不相通。江左制韻之初。但知縱有四聲。而不知衡有七音。故經緯不交。而失立韻之原。往往拘礙不相爲用。宋之有司。雖嘗通併。僅稍異於類譜。君子患之。當今聖人在上。車同軌而書同文。凡禮樂文物咸遵往聖。赫然上繼唐虞之治。至於韻書。亦入宸慮。下詔詞臣。隨音刊正。以洗千古之陋習。猗歟盛哉。雖然。旋音以七音爲均。均言韻也。有能推十二律以合八十四調。旋轉相交。而大樂之和亦在是矣。所可愧

者○臣○濂○等○才○識○闇○劣○無○以○上○承○德○音○受○命○震○惕○罔○知○攸○措○謹○拜○手○稽○首○序○于○篇○端○于○以○見○聖○朝○文○治○大○興○而○音○韻○之○律○悉○復○於○古○云○

夏鍾曰駁沈韻之繆當矣然學士家至今奉沈韻爲科律何哉

春秋屬辭序

春秋古史記也○夏商周皆有焉○至吾孔子○則因魯國○之史○修之○遂爲萬代不刊之經○其名雖同○其實則異○也○蓋在魯史○則有史官○一定之法○在聖經○則有孔子○筆削之旨○自魯史云亡○學者不復得見○以驗聖經之○所書○往往混爲一塗○莫能致辨○所幸左氏傳○尚明魯○

史遺法。公羊穀梁二家。多舉書不書以見義。聖經筆削粗若可尋。然其所蔽者。左氏則以史法爲經文之書法。公穀雖詳於經義。而亦不知有史例之當言。是以兩失焉。爾左氏之學既盛行。杜預氏爲之註。其於史例推之頗詳。杜氏之後。唯陳傅良氏因公穀所舉之書法以考正左傳。筆削大義最爲有徵。斯固讀春秋者之所當宗。而可憾者。二氏各滯夫一偏。未免如前之弊。有能會而同之。區以別之。則春秋之義昭若日星矣。奈何習者多忽焉。而弗之察。其有致力於此而發千古不傳之秘者。則趙君子常其人乎。子常蚤

受春秋於九江黃先生楚望先生之志以六經明晦
爲已任其學以積思自悟必得聖人之心爲本嘗語
于子常曰有魯史之春秋則自伯禽至於頃公是已
有孔子之春秋則起隱公元年至於哀公十四年是
已凡一事中皆具二義必先考史法然後聖人之筆
削可得而求矣子常受其說以歸晝夜以思忽有所
得稽之左傳杜註備見魯史舊法粲然可舉亟往質
諸先生而先生歿已久矣子常益竭精畢慮幾廢寢
食如是者二十年一旦豁然有所悟入且謂春秋之
法在乎屬辭比事而已於是離析部居分別義例立

爲八體以布列之。集杜陳二氏之所長。而棄其所短。有未及者。辨而補之。何者。爲史策舊文。何者是聖人之筆削。悉有所附麗。凡暗昧難通。歷數百年而弗決者。亦皆迎刃而解矣。遂勒成一十五卷。而名之曰春秋屬辭。云。嗚呼。世之說春秋者。至是亦可以定矣。濂頗觀簡策所載。說春秋者。多至數十百家。求其大槩。凡五變焉。其始變也。三家競爲專門。各守師說。故有墨守膏肓廢疾之論。至其後也。或覺其膠固已深。而不能行遠。乃倣周官論人之義。而和解之。是再變也。又其後也。有惡其是非淆亂。而不本諸經。擇其可者。

存之其不可者舍之。是三變也。又其後也。解者衆多。實有溢于三家之外。有志之士。會粹成編。而集傳集義之書愈盛焉。是四變也。又其後也。患恒說不足聳人視聽。爭以立異相雄。破碎書法。牽合條類。譁然自以爲高。甚者分配易象。逐事而實之。是五變也。五變之紛擾不定者。蓋無他焉。由不知經文史法之殊。此其說愈滋。而其旨愈晦也。歟。子常生於五變之後。獨能別白二者。直探聖人之心。於千載之上。自非出類之才。絕倫之識。不足與於斯。嗚呼。世之說春秋者。至是亦可以定矣。子常姓趙氏。名沔。子常字也。歟。休寧。

人。工古文辭。尤邃於諸經。雖疾病沉鬱之久。不忘著書。隱居東山。四方學子尊之。稱為東山先生。子常別有春秋師說三卷。春秋左氏傳補註三卷。春秋習傳十五卷。與屬辭並行于世。前史官金華宋濂謹序。

夏鍾曰。有魯史之春秋。有孔子之春秋。義例較然。自在天壤中。詳五變。確甚。亟登之。使讀麟經者得焉。

理學纂言序

白孟子之歿。大道晦冥。世人擿埴而索塗者。千有餘載。天生濂洛關閩四夫子。始揭白日於中天。萬象森列。無不畢見。其功固偉矣。而集其大成者。唯考亭子。

朱子而已。四夫子之微辭精義。朱子與呂成公既已纂成近思錄。以六百二十二條彙分十又四篇。朱子之道。無異於四夫子也。其散見語言文辭者。廣博淵深。若未易涯涘。烏可以不成編。是故覺軒蔡氏與三嶼陳氏。皆嘗采爲續錄以傳。退軒熊氏。患其去取不同。撫朱子諸書之至精者爲語要。而於論學論事尤詳。虛谷方氏與熊氏同時。則又以爲門人之所紀錄。不盡得其真。未若文辭出於親製而無可疑。復於百十卷中。句抄節析。爲四十類。名之曰晦庵集鈔。嗚呼。尊朱子之學者。諸家亦可謂有其志矣。然而傷於簡

者。既不足盡其真醇。病於繁者。又不能領其樞要。二者。蓋胥失焉。烏傷朱君伯清。自幼至老。酷嗜朱子之書。每謂人曰。朱子之學。菽粟布帛也。天下一日不可無也。伯清既受薦爲國史編修。簡主知特詔授經於楚王府。其見於辭章。資爲講說。皆以朱子爲宗。已而不俟引年納祿而歸。寄迹浦陽江上。日取朱子書溫繹之。察陰陽鬼神之運行。驗心情性命之發舒。明白昭著。循環無窮。皆本乎道體之妙。所見端確。所得粹凝。於是卽朱子精語。編成理學纂言一書。其凡例全倣近思錄。其所采語錄。雖雜以方言。唯恐失真。

片辭不敢移易。氣象或不類者刪之。其於文集則節取切而要者載焉。凡八千三百條。方之於諸家。殊適厥中。取而讀之。不翅親逢朱子在坐。而見門人難疑答問之盛。不知其身生於二百年之後也。伯清嘉惠後學之功。何其至歟。世之好著書者多矣。持一偏之見。操無根之學。肆口詆斥。恬不自愧。何嘗能窺朱子之藩籬。是皆獲罪於伯清者也。抑嘗聞孔子天之孝子也。以其扶持天地。植立綱常。爲千萬世計也。朱子之志。實與孔子同。是亦孔子之孝子也。當今學者瀾倒波隨。一惟卑陋之歸。伯清能尊朱子之學而扶導。

之○豈○非○朱○子○之○孝○子○乎○夫○孝○者○善○繼○人○之○志○者○伯○清○
實○有○焉○伯○清○名○濂○官○至○楚○相○府○長○史○其○父○裕○軒○先○生○
師○事○許○文○懿○公○公○則○上○承○朱○子○六○傳○之○緒○其○家○學○淵○
源○蓋○有○所○自○云○

夏鍾曰孔子天之孝子朱子孔子之孝子朱子之
學菽粟布帛天下不可一日無俱至精不易之論

革象新書序

革象新書者趙督先生之所著也○先生鄱陽人○隱遁○
自晦○不知其名○若字○或曰名敬○字子恭○或曰友欽○其○
名弗能詳也○故世因其自號稱之○爲緣督先生○先生○
宋宗室之子○習天官遁甲鈴式諸書○欲以事功自奮○

一日坐芝山酒肆中逢丈夫修眉方瞳索酒酣飲先生異而卽之相與談玄者頗久且曰汝來何遲也於是出囊中九還七返丹書遺之臨別先生問其姓名曰我扶風石得之也得之蓋世傳杏林仙人云先生自是視世事若漠然不經意間往東海上獨居十年註周易數萬言時人無有知者唯傳文懿公立極畏敬之以爲發前人所未言先生復悉棄去乘青驪從以小蒼頭往來衢婺山水間人不見其有所齋旅中之費未嘗有乏絕竟不知爲何術倦游而休泊然而亡遂塋於衢之龍游雞鳴山原有朱暉德明者龍游

人也。久從先生游。得其星曆之學。因獲受是書。而暉亦以占天名家。暉既沒。其門人同里章濬。深懼泯滅。無傳。亟正其舛訛。刻於文梓。而來徵濂爲之序。濂聞天官之說。歷代所步。必微有弗同。蓋欲隨時考驗。以合於天運而已。自唐涉宋。其法寢精。至元爲尤密。耶律文正王楚材。以金大明曆後天。乃損節氣之分。減周天之杪。去交終之率。治月轉之餘。以至兩曜五行。後先出沒。皆有以研窮之。而正其失。且以西域與中國地里相去之遠。立爲里差。以增損之名。曰西征庚午元曆。可謂無遺憾者矣。已而許文正公衡。王文肅

公恂太史令郭公守敬復與南北日官陳鼎臣鄧元
麟等徧參累代曆法重測日月星辰消息運行之變
酌取中數以爲曆本卽所定授時曆曆經曆議二書
猶存可考證弗誣也君子謂當世所推步者皆二三
大儒會其精神博其見聞備其儀像而後能造其精
微今先生值屋書有禁之時又獨處大江之南且無
所謂觀天之器其所著書往往與諸公脗合而無間
者雖絕倫之識有以致之誠以人心之理本同故皆
相符而無南北之異也抑余聞西域遠在萬里之外
元旣取其國有札馬魯丁者獻萬年曆其測候之法

但用十二宮而分爲三百六十度。至於二十八宿次
舍之說。皆若所不聞。及推日月之薄蝕。頗與中國合
者。亦以理之同故也。嗚呼。四海內外。凡圓顱方趾之
民。其心皆同。其理皆不殊也。豈特占天之事爲獨然
哉。先生之易。已亡於兵燹。所著兵家書暨神仙方技
之言。亦不存。其所存者。僅止此而已。當與曆經並行
無疑。濂故特序先生之事於篇首。使讀者知先生之
學通乎天人。庶幾相與謹其傳焉。

夏鍾曰。趙督先生異人。其曆書傳授亦異也。夫耶
律楚材之於曆精矣。西域萬年曆測候法較簡而
與中國合何也。然則六合
以外豈盡可存而不論乎。

篆韻集鈔序

昔漢許慎氏作說文解字十四篇。隨其偏傍。分爲五百四十部。其文則九千三百五十有三焉。南唐徐內史。錯苦其偏傍奧密。不可悉知。而欲便於披閱。乃以切韻譜其四聲。名曰說文韻譜。篆之有韻。蓋自內史始。宋吳巖李燾以韻譜局於四聲。則偏傍卒未易見。復依類篇分五音先後。悉取說文次第而聯貫之。至合溪戴洞之出。用九類括說文之諸部。與韻譜等書。各自名家。然互補益而未有能集之者。鄱陽劉君爆。幼承先訓。畱意於篆學。歷年之久。靡不貫通。於是用

韻譜爲宗。而其先後則分以五音。每字之下。又析以九類。先儒之說。有相發明者。輒具錄之。字義之未安者。必疏其是非。而申以已說。說文所引古文六經。其字與今所行本。或不同。集爲一編。以附其後。共成若干卷。精密而不失於粗疎。嚴簡而不致於冗泛。其可傳世。蓋無疑者。夫自必犧命子襄爲飛龍氏。造爲六書。至黃帝時。倉頡從而衍之。世相授受。文字孳育。周因建外史以掌其事。秦漢以來。官廢弗設。遂致訛繆失真。許氏竊患之。采史籀李斯揚雄之書。博訪通人。兼考之於賈逵。然後集爲說文之書。當是時。去古猶

近遺文宜可徵。故其說最有據。依所謂部端五百餘字。蓋倉頡篇云。嗚呼。向非許氏六書之學。其不微且絕邪。李陽冰生於唐代。去許氏則遠矣。雖號宗其書。輕肆臆說。妄加排斥。內史頗以爲恨。作繫傳四十卷。而反正之。謂之傳者。欲尊之如經也。內史之後。唯吳興道士張有尊之之意。畧同許氏之學。遂如金科玉條。爲世之法。程間嘗獲習其書。美則美矣。而重複闕逸。尚多有之。古籀二文。亦疑呂忱叅入其間。今世之所存者。未必皆許氏之舊。然則繹之正之。有賢者作。不能不盡心於斯也。雖然。說文其至矣乎。濂自來金。

陵見六書正譌說文字原二書乃鄱陽周伯琦氏所
造頗以許氏爲宗今又覩爆是書亦羽翼說文之學
唯恐其不明何鄱陽之多賢邪周氏之所著已盛行
爆之此篇士大夫多願觀之濂故爲序作者之意於
篇首嗚呼契二儀之運該萬彙之理無過於六書博
雅之士慎母以爲小學而忽諸則善矣爆字彥正嘗
爲嚴之建德令氣貌粹然有德君子也其於名物制
度之學尤精云

夏鍾曰昔人以九品品書劉君以五音譜篆君子
之於物也無所苟而已苟于物亦將苟于道矣

重校漢隸字源序

隸之源何始乎曰秦皇時程邈減小篆爲之便於隸
佐故名曰隸書然未有點畫俯仰之態故西京之世
金石刻皆鮮用之至東漢時賈魴以寫三蒼其法方
大行勒諸碑碣者多紛紛隸書矣考洪适之所輯西
京僅一二見東漢則不啻數百如是則謂之源於漢
亦可也曰非漢也而秦亦非也按齊之胡公太公六
世孫先秦皇四百餘年後有發其臨淄冢者棺上有
文隱起字與漢隸正同由是而觀非秦也源於周也
邈則推廣之耳雖然非周也曷爲知非周也使臨淄
之棺不發孰不謂其必始於秦哉先秦皇四百年已

有隸書矣。又焉知先胡公四百年果無之哉。去古既遠。人無由稽其詳。爾濂竊意伏羲之畫八卦。卽字之本。源倉頡衍而爲古文。其五百四十言。列於許慎說文。每部之首。蓋與篆籀似無大異。此固篆籀之變。因之而相生。豈隸書獨有待於後世邪。夏殷以來。諸侯之國。各有書。其體制或殊。或一。或可辨。或不可辨。然亦不越乎六書。甚若沿襲爲之。而畧加變通者。隸與篆籀雖微有不同。疑其間出於古文之後。各以其名爲家。或自業之精者相傳。爾不然。許慎嘗病當世學者。稱秦之隸書爲倉頡時書。其虛稱邪。抑亦別有所

本邪濂皆不敢必其然也。同姓宋君季子博學篤行。且畱意於隸古之書。所獲漢魏諸碑刻。必夙夜潛玩。不知有寒暑。其父友處士桂毓。刑部王經勸之曰。學必有師。無師雖勞弗工也。季子乃三走鄱陽。見伯誠先生歐君復。歐君憫其用志不分。悉以作隸之法授受焉。凡陰陽向背。性情逆順。俱得其要領。久之復往龍虎山中。質諸方壺翁從義翁。蓋深於隸學者。見季子欣然接之。語蟬聯不自休。季子於是學大進。遂以善隸書知名。當時先是宋儒有婁機彥發者。樵季之人也。以世所存漢碑三百有九韻類其字。字有數體。

具列之。號之曰漢隸字源。季子頗病其未博。研精覃思。增多一千八十七字。仍集師友微言。作漢隸綱領一十四則。別撰辨訛字類。及連綿字畧。又一千三百八十四字。至若字有闕遺。采班馬二家所用者。補之。目爲兩漢字統。以附字源之後。二書各六卷。合爲十二。可傳於學者。嗚呼。金石諸刻。歐陽修著爲集古錄十卷。趙明誠倣集古而爲金石錄。卷數則再倍之。歐陽之未及者。趙恒足焉。至於洪适之出。獨於隸學。是攻其述。隸釋二十七卷。隸續二十一卷。可謂富且侈矣。然而見聞有限。或未免於疏脫。此婁氏字源。亦不

可○作歟○今觀季子之重校○非惟有功○彥發抑可以
補洪氏之不及矣○當今大明麗天○正四海同文之時○
他日或援蔡邕故事○立石經於太學門外○舍季子將
焉徵哉○願季子善自愛也○濂三復其書○僭爲序其篇
端○嗜古之士○必有以濂爲知言者○季子以字行家於
臨川○爲詩文有法○以道自守○不爲外物所移○禮部朱
君夢炎極推重之○謂無讓大雅君子云○

夏鍾日人知隸書之源於秦而不知源於周
也伏羲之畫倉頡之衍皆天地自然之文耳

曾助教文集序

臨川曾先生旦所爲文凡若干篇○其門人某類編成

書。而以首簡請余序。序曰。天地之間。萬物有條。理而弗紊者。莫非文。而三綱九法。尤爲文之著者。何也。君臣父子之倫。禮樂刑政之施。大而開物成務。小而旋身繕性。本末之相涵。終始之交貫。皆文之章章者也。所以唐虞之時。其文寓於欽天勤民。明物察倫之典。三代之際。其文見於子丑寅之異建。貢助徹之殊賦。載之於籍。行之於當世。其大本旣備。而節文森然。可觀傳有之。三代無文人。六經無文法。無文人者。勅作威儀。人皆成文。無文法者。物理卽文。而非法之。爲一。秦漢以下。則大異於斯。求文於竹帛之間。而文

之功用隱矣。雖然此以文之至者言之。爾文之爲用其亦溥博矣乎。何以見之。施之於朝廷則有詔誥冊祝之文。行之師旅則有露布符檄之文。託之國史則有記表志傳之文。他如序記銘箴贊頌歌吟之屬。發之於性情。接之於事物。隨其洪纖。稱其美惡。察其倫昂之詳。盡其彌綸之變。如此者。要不可一日無也。然亦豈易致哉。必也本之於至靜之中。參之於欲動之際。有弗養焉。養之無弗充也。有弗審焉。審之無不精也。然後嚴體裁之正。調律呂之和。合陰陽之化。攝古今之事。類人已之情。著之篇翰。辭旨皆無所畔背。雖

未造於至文之域而不愧於適用之文矣。嗚呼文乎。其可易言矣乎。今吾先生淹貫羣經。所謂三綱九法。其文理之粲然者。加體索而擴充焉。嘗以春秋連貢。予鄉科目既廢。益寓意於古文辭。用功於動靜者久。聲光燁然起士林中。予取而讀之。藻火黼黻之交輝。金聲玉振之迭奏。魚龍波濤之驚迅。一一可以適於世用。信夫萬物各有條理者。於先生之文亦可以見之。余在詞林。先生方助教成均。朝夕相與論文甚驩。其間其門人所請推原文之至者而爲之序。著源委之真。欲體用之兼舉也。

夏鍾曰文不從靜養得來但按竹帛演習如傀儡登
場無生機血脉老聃所謂芻狗莊生所謂惆甲也

徐教授文集序

曹丕有言文章者不朽之盛事其故何哉夫山之巍
然有時而崩也川之泓然有時而竭也金與石至固
且堅亦有時而銷泐也文辭所寄不越乎竹素之間
而謂其能不朽者蓋天地之間有形則弊文者道之
所寓也道無形也其能致不朽也宜哉是故天地未
判道在天地天地既分道在聖賢聖賢之歿道在六
經凡存心養性之理窮神知化之方天人應感之機
治忽存亡之候莫不畢書之皇極賴之以建彝倫賴

之以敘人心。賴之以正。此豈細故也哉。後之立言者。必期無背於經。始可以言文。不然。不足以與此也。是故揚沙走石。飄忽奔放者。非文也。牛鬼蛇神。詭誕不經。而弗能宣通者。非文也。桑間濮上。危絃促管。徒使五音繁會。而淫靡過度者。非文也。情緣憤怒。辭專譏訕。怨尤勃興。和順不足者。非文也。縱橫捭闔。飭非助邪。而務以欺人者。非文也。枯瘠苦澁。棘喉滯吻。讀之不復可句者。非文也。瘦辭隱語。雜以詼諧者。非文也。事類失倫。序例弗謹。黃鐘與瓦釜並陳。春穠與秋枯並出。雜亂無章。刺昧人目者。非文也。吳腐塌茸。厭厭

不振。如下俚衣裝。不中程度者。非文也。如斯之類。不
能徧舉也。必也旋轉如乾坤。輝映如日月。闔闢如陰
陽。變化如風霆。妙用同乎鬼神。大之用天下。國家小
而爲天下。國家用始。可以言文。不然。不足以與此也。
故所貴乎文者。前乎千萬世。而不見其始。後乎千萬
世。而不知其終。有不可一刻而離去者。其能致不朽
也。宜哉。丕也。惡足以知之。徒以魯國孔融等七子。學
無所遺。辭無所假。足以令聲名傳後而已。安知其文
哉。傳有之言。以足志。文以足言。言之無文。行之不遠。
此則文之至者也。文之至者。文外無道。道外無文。粲

然載於道德仁義之言者。卽道也。秩然見諸禮樂刑
政之具者。卽文也。道積於厥躬。文不期工而自工。不
務明道。縱若蠹魚出入於方冊間。雖至老死。無片言
可以近道也。夫自孟氏旣沒。世不復有文。賈長沙董
江都太史遷得其皮膚。韓吏部歐陽少師得其骨骼。
後漢河南橫渠考亭五夫子得其心髓。觀五夫子之
所著。妙幹造化而弗違。百世以俟聖人而不惑。斯文
也。非宋之文也。唐虞三代之文也。非唐虞三代之文
也。六經之文也。文至於六經至矣。盡矣。其始無愧於
文矣。乎世之立言者。柰何背而去之。吾友天台徐君

大章賦資絕倫。自少學文。卽期以載道。非六經所存。不復輕寘。念慮於其間。含積既久。華然以文名江南。洪武中。嘗召入史館。與修大明日曆。遂出教授武林。日以橫經講道爲事。遠近生徒。莫不趨之。猶水之赴壑。當修日曆時。予適爲之總裁。每與大章論文。竊嘆今之作者。何其與古異也。大章深以予之言爲然。去歲過武林。獲觀其文集若干卷。今山居多暇。因徇大章門人之請。漫爲序其篇端。嗚呼。世有豪傑之士。知文與道非二致者。必以余說爲不謬。苟非其人。則以好高尚。誇尤之矣。予一聽焉。無事乎辨也。

夏鍾曰道在天地道在聖賢道在
六經真千古名言文章豈小道哉

白雲豪序

劉勰論文有云。論說辭序。則易統其首。詔策章奏。則
書發其源。賦頌歌讚。則詩立其本。銘誄箴祝。則禮總
其端。紀傳文檄。則春秋爲之根。嗚呼。爲此說者。固知
文本乎經。而濂猶謂其有未盡焉。何也。易之彖象。有
韻者。卽詩之屬。周頌敷陳而不協音者。非近於書歟。
書之禹貢顧命。卽序紀之宗。禮之檀弓樂記。非論說
之極精者歟。况春秋謹嚴。諸經之體。又無所不兼之
歟。錯綜而推。則五經各備文之衆法。非可以一事而

指名也。蓋蒼然在上者天也。天不能言。而聖人代之。經乃聖人所定。實猶天然。日月星辰之昭布。山川草木之森列。莫不繫焉覆焉。皆一氣周流而融通之。苟欲強索而分配。非愚則惑矣。夫經之所包。廣大如斯。世之學文者。其可不尊之以爲法乎。吾友朱先生伯賢。以純篤之資。而留意於辭章。先秦兩漢。以至近代諸文。無不周覽。用功之久。灼見其是非之真。復取近正無疵者。聚而爲書。蠅頭細字。動至數十大冊。時出而諷詠之。已而嘆曰。學文不本諸經。其猶玩培塿之卑。而忽嵩華之高乎。乃復致力於經。功益倍於前時。

越數歲。胸中浩然若有所得。操觚書之。凡陰陽盈虛之運。民物倫品之理。萬彙屈伸之變。皆隨事而著。源源乎罔。知其所窮。且其爲體多而不冗。簡而有度。神氣流動。而精魄蒼勁。誠可謂粲然藻火之章矣。濂之有志爲文。不下於伯賢。古今諸文章大家。亦多究心。及游黃文獻公門。公誨之曰。學文以六經爲根本。遷固二史爲波瀾。二史姑遲遲。盍先從事於經乎。濂取而溫繹之。不知有寒暑晝夜。今已四十春秋矣。用心之苦。雖與伯賢同。而伯賢之所造詣。濂固不能窺見其髣髴也。然而太上立德。其次卽立言。立言甚非易。

也。自孟子以來，致力於是者，非不多求其可與經並傳者。春○陵○周○元○公○一○人○而○已○。元公之言曰：文所以載道也。輪○轅○飾○而○人○弗○庸○，徒飾也。况虛車乎？是則文者非道不立，非道不克，非道不行。由其心與道一道與天。一故出言無非經也。元公豈嘗拘拘學爲文哉？濂與伯賢又當共勗之可也。伯賢以白雲稿若干卷請余序。濂故具論之，使知伯賢之文，壹以經爲本，而蹈襲近代以爲美者，其尚有所發也哉。伯賢名右，天台人。著書甚多，所謂春秋類編、三史鉤玄、秦漢文衡、深衣考、邾子世家傳，皆別行。

夏鍾曰以六經爲根本以遷固二史爲波瀾
天下之至文也此公生平得力於黃文獻處

漢天師世家序

嗣漢四十二代天師張真人以世家一卷命上清道士
傅同虛徵濂序其首簡濂聞古者名世諸臣史官
必爲序其世系表以傳所以敦本始昭功伐也況於
神明之胄理有不可得而闕者今所輯世家但始於
畱文成侯而其上則無聞焉濂因據氏族羣書補之
復用史法畧載其相承之緒使一閱輒知大都而其
詳別見於左方云序曰張出自姬姓軒轅子青陽
氏第五子揮爲弓正始造弓矢張羅以取禽獸主祀

弧星世掌其職。賜姓張氏。周宣王時有卿士張仲。其
後裔事晉爲大夫。張侯生老。老生君巫。君巫生超。超
生貉。其孫曰抑。朔至三卿分晉。張氏事韓。韓相開地。
相韓昭侯。宣惠王。襄哀王。開地生平。相釐王。悼惠王。
平生良字子房。漢太傅留文成侯。居沛之豐邑。生二
子。侍中辟疆及不疑。不疑嗣侯。生二子。典。高。典生默。
默生太司馬金。金生陽陵公乘千秋。千秋字萬年。生
嵩。嵩生五子。壯。讚。彭。睦。述。其後多以功烈著。傳至於
唐。列爲安定。范陽。太原。南陽。燉煌。修武。上谷。沛國。梁
國。滎陽。平原。京兆等四十三望族。中出宰相凡十七

人。高生通。通生無妄。無妄生里仁。里仁生覺。覺生起。起生桐栢真人。大順。大順生漢天師道陵。是爲立教之宗。其傳緒悠長。倍前望族之盛。論者弗察。見留侯再世。國除。卽意其絕嗣。殊不知流裔南北。如斯之繁也。道陵字輔漢。建武十年生於吳之天目山。暨長。博習群書。從學者千餘人。尋中直言極諫科。拜巴郡江州令。棄官。隱洛陽北邙山。修煉形之術。章帝以博士徵。不赴。和帝卽位。召爲太博。封冀侯。亦不就。乃杖策遊淮。入鄱陽。上龍虎山。合九天神丹。訪西仙源。獲制命五嶽。攝召萬靈。及神虎秘文於璧。晉源。俄往嵩山。

石室得黃帝九鼎丹書。及道旣成。聞巴蜀沴氣爲人
菑。銳意入蜀。初居陽平山。遷鶴鳴山。感立元老君。屢
受以經籙之法。於是分形示化。復立二十四治。增以
四治。以應二十八宿。妖厲爲之衰熄。如發醢泉。破鬼
城之事甚多。不能備載。永壽二年。復遷渠亭山。出三
五斬邪雌雄劍。二陽平治都功印。一授嗣天師。衡使
世世相傳。乃乘雲上升。壽蓋一百二十。又三云。衡字
靈真。有長材。詔徵黃門侍郎。辟隱居陽平山。誓以忠
孝導民。君子謂其有繼宗開緒。納俗安善之功。衡生
京師。魯字公祺。益續前人之烈。以鬼道教人。自號師

君○其○來○學○道○者○初○皆○名○鬼○卒○受○本○道○已○信○虎○祭○酒○各○
領○部○衆○多○者○爲○治○頭○大○祭○酒○皆○教○以○誠○信○不○欺○詐○有○
病○者○自○首○其○過○復○設○義○倉○置○義○米○肉○其○中○任○人○量○腹○
取○飽○過○取○則○有○禍○人○歸○者○日○益○衆○遂○雄○據○漢○中○詔○授○
鎮○民○中○郎○將○領○漢○寧○太○守○其○後○歸○魏○太○祖○拜○鎮○南○將○
軍○封○閬○中○侯○五○子○皆○爲○列○侯○女○歸○太○祖○子○彭○祖○魯○死○
謚○原○侯○生○盛○字○元○宗○魏○太○祖○封○都○亭○侯○弗○受○始○自○漢○
中○還○龍○虎○山○創○三○元○日○升○壇○授○籙○盛○生○昭○成○字○道○融○
端○坐○石○室○虎○豹○逢○之○皆○伏○暨○化○去○或○見○騎○鶴○遊○空○中○
啓○冢○驗○之○唯○冠○履○畱○耳○昭○成○生○椒○晉○安○帝○召○之○不○至○

椒生圓。圓生迥。迥生符。符生祥。祥字麟伯。隨洛陽尉。能吐丹。寘掌中。光芒穿屋。復吞之。祥生通元。歲大疫。以標植水中。汲飲者咸愈。通元生恒。唐高宗問治國。恒對曰。能無爲。則天下治矣。上嘉之。恒生光。光生慈。正慈。正生士龍。士龍忘玉印。長安酒家一少年。盡力舉之。不動。明日。士龍笑而携去。士龍生應韶。應韶生頤。頤生士元。字仲良。瘠而多髯。居應天山四十年。山多虎。人莫敢謁焉。每大風雨。遙見乘黑龍往來諸峰間。士元生脩。脩生謹。謹生秉一。字溫甫。目光如電。夜能視物。嘗負劒行山澤間。叱一老樹。雷卽震裂之。擊

死二巨蟒及小蛇餘百。秉一生善。善生季文。五代之季。受其錄文者頗衆。乃鑄鐵環券數萬繼之。季文生正隨。宋太中祥符八年召至闕。賜號曰真靜先生。後凡稱先生者皆賜號也。吏部尚書王欽若爲奏立授錄院。正隨生澄。素先生乾曜。乾曜生虛白先生嗣宗。嗣宗生象中。字拱辰。生三月能行。五月能言。七歲朝京師。錫以紫衣。象中生葆光先生敦復。無子。從子葆真先生景端。嗣景端亦無子。從弟虛靜先生繼先。嗣繼先字嘉聞。五歲不解言。聞雞鳴忽失笑。賦詩人異之。崇寧初解池鹽水溢。遣使者召見。書鐵符投之。怒。

靈磔蛟死於水裔。一日隨上入寢殿。宮嬪競以扇求書。繼先以經語書之。皆密契其意。中舉一握稽手書曰。保鎮國祚。與天長存。乃上所御者也。上奇之。命禱雨三日乃止。授大虛大夫。不拜。詔江東漕臣卽山中度地。遷建上清觀。改爲上清正一宮。從其學道者恒數十百人。靖康初。上復召時。金人犯汴。行至泗州。天慶觀索筆寫詩。隱几而化。塋于龜山之麓。後十六年。西河薩守堅遊青城山。相遇於峽口。繼先以書一封。赤舄一隻。令達嗣天師家。嗣天師大驚。使人啓龜山之寔。唯一舄存。繼先無嗣。以象中之孫時修嗣。時修

曰繼先從子也。吾烏得後之。衆曰。法統所在。孰得而
奸。乃從。時修生正應先生守真。守真在母胎歷十九
月始產。醴陵有妖憑樹。詔劾之。一夜風雷拔去。後定
濤江衝決。高宗賜以象簡寶劔。清靜陰符二經。守真
生景淵。景淵生慶仙。張公洞有井甚深。慶仙戲折木
葉擲之。俄波濤騰湧。有一老翁從中出。慶仙呵戒之
而去。慶仙無子。從子觀妙先生可大嗣。可大守真之
曾孫。其祖伯塢父天麟皆常主教事。鄱陽水漲。壞民
廬無數。袁提刑甫請可大治之。殛死大白蛇。水遂平。
尋又遇旱蝗。可大禳之。雨作而蝗殫。勅受提舉三山

符籙兼御前諸宮觀教門公事。主領龍翔宮時。當宋季元世祖聞其神異。密遣間使訊之。可大授以靈詮。且謂使者曰。善事爾主。後二十年當混一天下。逮至元十三年。果驗。可大生宗演。字世傳。世祖平宋。憶其父言有徵應。遣兵部郎中王世英。刑部郎中蕭郁賁。詔召之。賜玉冠玉圭。冠以靈應冲和真人之號。仍給三品銀印。令主江南道教事。得自出牒度人爲道士。宗演生與棣。字國華。世祖時宣受體元弘道廣教真人。賞賜優渥。竟卒于京師。與棣無子。弟與材嗣。與材字國梁。元貞初入見大明殿。制授大素凝神廣道大

真人。大德二年。海鹽鹽官兩州潮水大作。沙岬百里。蝕齧殆盡。延及州城下。與材投鉄符於水。符踊躍出者三。雷電晦冥。殲怪物。魚首龜身。其長丈餘。隄復故。常五年冬無雪。上曰。冬無雪。民間得毋有災害乎。與林爲建壇禱之。是夜雪下盈尺。上大喜。命近臣賜酒。曰。卿能感神明。一至此耶。八年。錄平潮功。加授正一教主。兼主領三山符籙。給以銀印。視二品。九年。崇明州海隄崩。俾弟子持符往効之。民夢有神填海者。遂安。至大初。加賜寶冠金服。制授金紫光祿大夫。封留國公。給以銀印。視一品。與材生太玄。字嗣成。嗣成卒。

弟嗣德嗣嗣德卒其子正言嗣正言卒太玄之子正
常嗣正常字仲紀卽今天師國朝六觀京師洪武初
制授正一護國闡祖通誠崇道弘德大真人領道教
事給以銀印視二品上復賜以褒文稱其瞳樞電轉
法貌昂然人以爲榮蓋歷代相傳以眼圓而鉅者
爲玄應故上因及之云濂聞文成侯年少時學禮淮
陽東謁蒼海君蒼海君先儒學士以爲海神是也後
又見異人黃石公下邳圯上則其未達之際固已能
交通於神明至其晚年名遂功成乃欲辟穀從赤松
子游實其初志非曰托之以自逃也故其九傳至漢

天師感慕興起學輕舉延年之術。祓除陰慝。一以善道化民。而嗣師系師繼之。修其業而弗墜。唯恐有人橫遭天閔者。當漢之季。天下雲擾。唯巴漢之間。民生晏然。行者不裹糧。居者不捍關。官府賴以成治。如此者。垂二十年。其功之及物。可謂侈矣。宜其世有令人出俾至化。奚翅古諸侯之國。天之報施。不亦彰明者哉。或者專歸於名山神氣之結。故能演迤盛大如斯。其論亦淺矣。嗚呼。文成侯子孫。南北在在。有之。其以功烈顯著者。小則克法從大。則至宰輔。非不光明俊偉也。曾未幾何。降爲皂隸者。有不免焉。其視玄裔相。

仍歷千二百有餘歲而未已者爲何如蓋必有其道矣。嗣而興者尚知最哉。尚知最哉。

夏鍾曰。玆裔相傳歷千百年而未艾。異哉。道教之重久一至此耶。序次世系未復感慨一番。居然龍門筆法。

卷之一

三

重八一至北曜氣大世系未盡風潮一音詩然

矣。而興者尚咲，最尚咲，最

外。至千二百餘緡。而未有告爲何狀。蓋必得其

宋文憲集卷之三

金華宋

濂景濂著

晉江張汝瑚夏鍾選

序

皇明雅頌序

皇明雅頌者。鄱陽劉仔肩之所集也。其曰雅頌者何。雅者。燕饗朝會之樂歌。頌則美盛德。告成功於神明者也。今詩之體與雅頌不同矣。猶襲其名者何。體不同也。而曰賦曰比曰興者。其有不同乎。同矣。而謂體不同者。何時有古今也。時有古今也。柰何。今不得爲古。猶古不能爲今也。今古雖不同。人情之發也。人聲。

之宣也。人文之成也。則同而已矣。然則曷爲謂之同。江河沼沚。有不同也。水則同。陵巒岡阜。有不同也。土則同。人動乎物。有不同也。感則同。趨其同而舍其異。是之謂大同。曷爲知其爲大同。期歸於道焉。爾歸於道焉。爾者何世之治聲之和也。聲之和也。柰何。天聲和于上。地聲和于下。人聲和于中。則體信達順至矣。體信達順。其亦有應乎。曰有三秀。榮朱雀。見龜龍出。騶虞至。嘉禾生。何往而非應也。應則烏可已也。烏可已。則有作爲雅頌。被之弦歌。薦之郊廟者矣。是集之作。其殆權輿者歟。

夏鍾曰今樂猶古六朝以後郊廟之歌儘有佳篇
反自遜以漢人爲不可及又安敢希聲雅頌乎

御賜甘露漿詩序

洪武癸丑正月始和越四日丙午時加巳皇上御武
樓之便閣召御史中丞臣寧太子贊善大夫臣濂賜
坐左右上談嘉祥之應勅中貴人取所儲膏露於宮
中○俄盛以翠巵跪進上前皆玉潔珠圓○世所未覩已
而詔昇爨器至用金杓煉水二升火既勻水勢成濤
上起自龍帳中親啓巵以投須臾融化與水爲一上
取杓中瀉二內侍舉幕承之查滓已淨重漉以絳紗
囊上飲一爵而分賜臣寧與臣濂焉且曰此天地至

和所凝也。卿等服之。去沈痼而衍遐齡。臣寧等跪飲。其味甘如飴而弗膩。其氣清於蘭而不豔。一入口間。神觀殊覺爽越。飄飄然欲御風而行。於是各奠爵於几。頓首于地而退。臣寧謂臣濂曰。唐之李白。召對金鑾殿。玄宗調羹以賜。方策尚載之。以示後世。矧今聖天子親挹天乳。以沃近侍。微臣共享二氣。禎祥此立。黃覆持之恩。不可忘也。宜發爲聲詩。以彰君之賜。臣濂伏聞王者有德。上通于天。嘉氣協應。鴻美滋播。今甘露頻降。大和埶比。民物敕寧。洽于太康。是皆一人有慶。使臣庶永有攸賴。方將涵育靈澤。衣被上德。惟

思日孜孜以圖報爲事皇上不自滿假錫釐羣臣霑
丐天漿上昭靈貺此與黃帝出馬腦甕甘露頒賜百
僚之意同誠非炫宗之所擬也盛德所覃接肌藏髓
曠世奇逢豈容喑默乃稽首再拜造詩一章以侈上
之賜從而屬和者凡若干人錄成一卷傳示萬世子
孫荷天之休至於無疆云

夏鍾曰清芬
之氣襲人

呂氏孝感詩序

天人之際難矣苟有以感之非難也天穹然而在上
人藐然而在下勢絕而分殊豈易感哉然人之身天

之氣也。人之性。天之理也。理與氣合以成形。吾之身與天何異乎。人或不察乎此。而謬迷其天性。始與天爲二矣。能以誠感。則天寧有不應之者乎。是理也。予觀於呂君爲允信。君諱某。字信夫。壽春人。事親至孝。而好黃老家養神之說。及親歿。三年之服終。猶哀慕如初。喪因却酒肉。弗御。每旦滌豆籩。具果疏。葵香鰓。天微冥。福於其親。如是者數十年。嘗汲井以行滌事。時盛冬。冰沍。有金色魚者。三人汲器中。信夫異之。特歸盛以陶缶。寘香几上。閭里人聞之。相携來觀者。充其庭。皆揖信夫而揚言曰。今茲大寒。魚潛不見。操網

罟者欲得一鱗不可致而信夫不求得之豈非天以
旌信夫之孝乎且夫金魚昔文臣貴者章服嘗用之
信夫子孫其有興者乎於是又皆揖而賀信夫却立
而拱曰吾子道之未盡安敢言孝苟以爲天之賜滋
不敢承乃致祭而投諸井中愈虔事天之禮又七年
而後卒旣卒其鄉人呂山見之於上真觀衣冠偉然
若神仙中人已而過問信夫則信夫死矣厥後其子
浙江鹽運使繼道以才德顯累官太常卿吏部尚書
轉僉北平按察司事以至於今階入三品黃金橫帶
爲時能臣由是其事傳于四方士大夫咸咏歌之而

嘆異之。嗟夫。信夫。以孝事親。誠格于天。而天以魚旌。之能養神。而神全不散。死而人或見之。斯二者。乃常理。爾又奚異乎。今繼道之顯融。固宜也。以魚數占之。顯者。殆三人乎。繼道其一矣。在其子與其孫。固未已也。昔者卜序白華之詩。不特曰美孝子。而必稱美其潔白。今其詩雖亡。而賴有序存。故不見其詩。而知孝子之行。余竊取是義。而具論其事。以序呂君孝感之詩。使觀者未見篇什。而可知其人。則亦卜氏之意。然天人之際。三百篇言之備矣。在作者之自取焉。

夏鍾曰。論天人合。一處極透。關末將奇事說得平常。愈見庸德之妙。

桃花澗修禊詩序

浦江縣東行二十六里有峰聳然而葱蒨者。玆麓山也。山之西。桃花澗水出焉。乃至正丙申三月上巳。鄭君彥真將修禊事于澗濱。且窮泉石之勝。前一夕宿諸賢士大夫。厥明日旣出。相帥向北行。以壺觴隨。約二里所。始得澗流。遂沿澗而入。水蝕道幾盡。肩不得比。先後纍纍如魚貫。又三里所。夾岸皆桃花。山寒花開遲。及是始繁。傍多髯松。入天如青雲。忽見鮮葩點濕翠間。燄燄欲然。可玩。又三十步。詭石人立。高可十尺餘。面正平。可坐而簫。曰鳳簫臺。下有小泓。泓上石。

壇廣尋丈可釣。聞大雪下時。四圍皆瑠樹瑤林。益清絕。曰釣雪磯。西垂蒼壁。俯瞰臺磯間。女蘿與陵苕繆。輻之。赤紛綠駭。曰翠霞屏。又六七步。奇石怒出。下臨小窪。泉冽甚。宜飲。鶴曰飲。鶴川自川導水爲蛇行勢。前出石壇下。鏘鏘作環佩鳴。客有善琴者。不樂泉聲之獨清。鼓琴與之爭。琴聲與泉聲相和。絕可聽。又五六步。水左右屈盤。始南逝。曰五折泉。又四十步。從山趾斗折入澗底。水滙爲潭。潭左列石爲坐。如半月。其上危巖墻峙。飛泉中瀉。遇石角激之。泉怒躍起。一二尺細沫散潭中。點點成暈。真若飛雨之驟。至仰見青

天鏡淨。始悟爲泉。曰飛雨洞。洞傍皆山。峭石冠其顛。
遼。負幽邃。宜仙人。居曰藥珠巖。遙望見之。病登陟之。
勞無往者。還至石壇上。各敷鞞席。夾水而坐。呼童拾
斷樵。取壺中酒溫之。實髹觴中。觴有舟。隨波沉浮。鴈
行下。稍前有中斷者。有屬聯者。方次第取飲。時輕颺
東來。觴盤旋不進。甚至逆流而上。若相獻酬狀。酒三
行。年最高者。命列觚翰。人皆賦詩二首。卽有不成。罰
酒三巨觥。衆欣然如約。或閉目潛思。或拄頰上視。霄
漢。或與連席者耳語不休。或運筆如風雨。且書且歌。
或按紙伏崖石下。欲寫復止。或句有未當。搔首蹙額。

向人。或口吻作秋蟲吟。或羣聚蘭坡。奪觚爭先。或持
卷授鄰坐者。觀曲肱看雲而卧。皆一一可画。已而詩
盡成。杯行無筭。迨罷歸。日已在青松下。又明日。鄭君
以茲游良驩。集所賦詩而屬濂以序。濂按韓詩內傳。
三月上巳。桃花水下之時。鄭之舊俗。於溱洧兩水之
上。招魂續魄。執蘭草以祓除不祥。今去之二千載。雖
時異地殊。而桃花流水。則今猶昔也。其遠裔能合賢
士大夫。以修禊事。豈或遺風尚有未泯者哉。雖然。無
以是爲也。爲吾黨者。當追浴沂之風。徽法舞雩之咏。
歎庶幾情與境適。樂與道俱。而無愧於孔氏之徒。無

愧於孔氏之徒。然後無愧於七尺之軀矣。可不勗哉。
濂既爲序。其游歷之勝。而復申以規箴。如此。他若晉
人蘭亭之集。多尚清虛。亦無取焉。鄭君名鉉。彥真字
也。

夏鍾日序末忽出正論不
病其腐前幅寫景殊佳

劉兵部詩集序

詩緣情而托物者也。其亦易易乎。然非易也。非天賦
超逸之才。不能有以稱其器。才稱矣。非加稽古之功。
審諸家之音節體製。不能有以究其施。功加矣。非良
師友示之以軌度。約之以範圍。不能有以擇其精。師

友良矣。非雕肝琢髓。宵咏朝吟。不能有以驗其所至之淺深。吟咏侈矣。非得夫江山之助。則塵土之思。膠擾蔽固。不能有以發揮其性靈。五美云。備然後可以言詩矣。蓋不得助於清暉者。其情沉而鬱。業之不專者。其辭蕪以龐。無所授受者。其制濫而乖。師心自高者。其識卑以陋。受質蹇鈍者。其發滯而拘。古之人所以擅一世之名。雖其格律有不同。聲調有弗齊。未嘗有出於五者之外也。濂於職方郎中劉君之詩。其殆無所愧矣。夫劉君名崧。字子高。故爲西昌大族。前代以科第發身者。三十七人。劉君亦以明經舉進士。而

其志之所嗜尤在於詩。况劉君天分甚高。自爲童子時。輒有驚人之句。比長益淬礪弗懈。上自詩騷。下從魏晉以來。迄于唐宋。凡數十百家。皆鑽研考覈。窮其所以言。用功既深。精神叅會。絕無古今之間。已而曰。此固可矣。然猶未也。乃束書走豫章。與辛敬萬石周湏。楊士弘鄭大同游。而此五人者。負能詩名。見劉君。皆驚異之。相與楊榘風雅。夙夜孜孜。或忘寢食。反徵之於古。瞭然白黑分矣。已而又曰。此固善矣。然猶未也。復痛自策督。日賦一篇。雖冱寒之折膠。熾暑之流金。劉君擁鼻鼓膝。時作嗚嗚聲。不成章不止也。數年

之間。卷軸盈几。已而又曰。此固若有得矣。然猶未也。復具布襪。行纏。臨釣臺上。三顧山。陟虎鼻峰。眺龍門。或竟日冥搜。或終月忘返。然以州里之近。未足以窮耳目之遐觀。環江右之境。有奇山川。不論道途之遠。必一至焉。襟宇向廣。終若未能舒暢。厥志復度庾嶺。勾曲江。翫韶石。過清遠峽。登越王之臺。斟酌流泉。游石室。歷觀海北名山。再涉鯨波。覽瓊臺雙泉之勝。而還劉君之詩。於是乎大昌矣。濂幸獲讀之。凌厲頓迅。鼓行無前。所謂緩急豐約。隱顯出沒。皆中乎繩尺。至其所自得。則能隨物賦形。高下洪纖。變化有不可測。

寘之古人篇章中。幾無可辨者。嗚呼。前千年而往者。吾以知其人矣。後千年而興者。孰敢謂無其人乎。苟謂有其人。非劉君之作。將能行之於遠乎。世無劉君。五美之具。而徒諉詩爲易易者。其果可信乎。濂也以繆悠之資。玩時愒日。不能成一章。性雅好登臨。又無濟勝之具。雖於諸家詩。無所不讀。終不及窺其藩籬。有負師友多矣。其視劉君。不亦重可愧乎。雖然。濂雖不善詩。其知詩。決不在諸賢後。故因作序。而相與一言之。使郊愈復生。當不易吾言矣。劉君之詩。十九歲以前皆焚去。二十至四十九之所存。亦十之七八耳。

今其門人蕭翀所編者凡若干卷。翀字鵬舉亦嗜於詩。蓋得劉君之傳者也。

夏鍾曰昔有語先輩者云公於古文不少讓而詩不類唐遂終身不復作詩吁詩蓋難言矣哉

林伯恭詩集序

詩心之聲也。聲因於氣。皆隨其人而著形焉。是故凝重之人其詩典以則。俊逸之人其詩藻而麗。躁易之人其詩浮以靡。苛刻之人其詩峭厲而不平。嚴莊溫雅之人其詩自然從容而超乎事物之表。如斯者蓋不能盡數之也。嗚呼風霆流形而神化運行於上。河嶽融峙而物變滋殖於下。千態萬狀沉冥發舒皆一。

氣貫通使然必有穎悟絕特之資而濟以該博宏偉之學察乎古今天人之變而通其洪纖動植之情然後足以憑籍是氣之靈彼局乎一才滯乎一藝雖欲捷騁橫驚以追于古人前之而愈却培之而愈低幾何不墮於鄙陋之歸此濂於伯恭之詩不能無感焉伯恭博極羣經而尤長於春秋嘗應書鄉闈實冠多士伯恭年始二十餘一旦名動海內自時厥後學益加修遂擢至正甲午進士第歷任省憲二府正色直言百壬畏懾時出奇計剪三逆豎如烹狐兔則其所養之克是氣浩然弗撓弗屈故其發於詩也沉鬱頓

挫渾厚超越大雅奏而黃鍾獨鳴也武庫開而五兵
森列也洪濤怒張而魚龍出沒也一展卷間呈珍獻
異可欣可愕精神爲之震眩濂前所謂聲因於氣皆
隨其人而著形者豈非然邪豈非然邪世之學詩者
衆矣不知氣克言雄之旨往往局於蟲魚草木之微
求工於一聯隻字間真若蒼蠅之聲出於蚯蚓之竅
而已詩云乎哉永嘉舊傳四靈詩識趣凡近而音調
卑促近代或以爲清新者競摹倣之濂每謂人曰誤
江南學子者此詩也聞者且疑而且信焉今吾伯恭
之詩出一洗習俗之陋信知豪傑之士自有其人也

故敢執筆直題於首簡。世有知言者，必深有取焉。伯恭名溫，姓林氏，溫之永嘉人。

夏鍾曰：識得氣充，言雄四字，可以作詩，可以讀詩。

劉母賢行詩集序

劉賢母王氏，諱某，太原崞人也。年十八，歸處士仲安。踰再期，生一子溥。又八年，處士君歿，賢母自誓曰：「吾聞貞婦不二夫，生爲劉家婦，死爲劉家鬼。無子當爾，況有子者乎？」確守其志，堅如鐵石。家素貧，逮處士卒貧，益甚。治絲枲自給，衣僅蔽身，日唯一食，艱瘁不可言。處之恒裕如也。里豪武氏子知賢母貧，或可撼使

猾姬誘而且脅。賢母痛詈斥之。終不移所守。親督溥。從鄉貢進士趙惟賢。國子助教張傳霖遊。師若友有。益溥者。賢母遇之厚。不以貧而廢禮。溥後以文行聞。卒爲名士。賢母性儼恪。有烈丈夫風。未嘗輕於笑語。契家子姓見之。趣敬畏。下拜。人因號爲鐵面夫人。云。里婦有淫行。招搖行市中。賢母知其所從來。以所曳杖擊之。婦哭訴於夫。夫曰。劉夫人何故撻爾耶。慚服不敢言。有姑適賈氏。老而喪明。其子某每拂其意。姑必泣告賢母。賢母造門而喻之。輒踰垣避去。某處士。中外第也。亦嚴憚之如此。他蓋可知也。年七十餘而。

喪當時南北名士大夫咸作詩文以美之命曰賢行
詩集云嗚呼詩者發乎情而止乎禮義也感事觸物
必形之於言有不能自已也昔者衛共伯早死其妻
共姜賦栢舟以自誓一則曰之死矢靡他二則曰之
死矢靡慝至今讀者爲之感激奮勵豈非有繫彝倫
之重者乎今也賢母之志與共姜同雖不自賦詩而
世之士大夫推其意而代之言此蓋出於民之性而
先王之澤也是宜刻梓傳世以爲人婦者之勸雖然
詩人之吟咏夥矣類多烟霞月露之章草木蟲魚之
句作之無所益不作不爲欠也華編巨冊摹印而行

者比比有之。其視賢母之詩。有補名教者。爲何如哉。知道之士。必有擇焉。

夏鍾曰。鐵面夫人之名。便可以壽千古矣。當時朝廷不加旌表。亦是缺事。

剡源集序

濂嘗學文於黃文獻公。公於宋季辭章之士。樂道之而弗已者。唯剡源戴先生爲然。濂因日購先生之文。絕不能以多致。會有詔纂修元史。命濂總裁其事。事有闕遺者。遂以上聞。遣使訪於郡國。竊以謂先生著作。有關於勝國宜多。乃屬使者入鄞。徧求之。鄞先生鄉國庶幾有得之者。曾未幾何。有司果以剡原集二

十八卷來上。濂始獲而盡覽焉。因作而曰。辭章至於
宋季。其敝甚矣。公卿大夫。視應用爲急。俳諧以爲體。
偶儷以爲奇。覲然自負其名高。稍上之。則穿鑿經義。
隳括聲律。孳孳爲譁世取寵之具。又稍上之。剽掠前
修語錄。佐以方言。累十百而弗休。且曰。我將以明道。
奚文之爲。又稍上之。騁宏博。則精麤雜糅。而略繩墨。
慕古與。則刪去語助之辭。而不可以句。顧欲矯弊而
其敝尤滋。私自念。辭章在世。如日月之麗乎天。雖疾
風暴雨。動作無時。將不能蔽蝕其精明。獨怪夫當時
之士。奚爲乏一人。障其狂瀾邪。復念豪傑之士。何代

云無第區區所見孤陋故鮮能知之非誠然也及覽先生之文新而不刻清而不露如晴巒出雲姿態橫逸而連翩弗斷如通川縈紆十步九折而無直瀉怒奔之失嗚呼此非近於所謂豪傑之士邪蓋先生七歲卽知攻文咸淳中入太學以三舍法陞內舍生旣而試禮部第十人登進士乙科調教授建寧府及遷臨安教授行戶部掌故皆不就會宋亡爲元執政者薦之起爲信州教授先生年已六十一矣尋遷婺州以疾辭後六年終初先生旣擢第憫宋季辭章之陋卽濯然自異久之四方人士爭相師法故至元大德

間東南文章大家皆歸之先生無異辭先生之歿僅六十年已罕有知其名若字者殊可哀也濂在史局旣命彙入儒學傳中及司業成均復將錄其剡源集者歸以示諸人而先生之鄉有夏君閱來爲國子正方與先生之孫資先謀刻于梓夏君遂以題辭爲請且謂知先生之深者唯黃文獻公公旣不可作子幸無讓於是忘其僭踰而爲序之如此嗚呼豐城之劍荆山之玉縱埋沒泉壤爲已久神光上貫於霄漢者終弗能掩也其先生之謂乎先生諱表元字帥初一字曾伯慶元奉化州人洪武四年秋八月望日金華

後學宋濂謹序

夏鍾曰戴先生稱東南文章大家乃沒僅六十年遂罕有知其名字者以此歎古今文章湮沒不少

張侍講翠屏集序

嗚呼先生之文濂何敢序之先生長濂凡九歲濂初濡毫學文先生已擢進士第列官州邑及其教成均入詞垣先生之文益散落四方濂得觀之未嘗不歛衽而以不能識面爲慊去年春始獲與先生會于建業各出所爲舊豪相與劇談至夜分弗之倦且曰吾生平甚不服人觀子之文殆將心醉也濂竊以謂先生素長者特假夫褒美之辭以相激昂爾非誠然也

曾未幾何先生使安南道次大江之西特造序文一首以寄其稱獎則尤甚於前日者濂讀而疑之酸醎之嗜偶與先生同故先生云然非濂之文果有過於人人也方將與先生細論而九原不可作矣嗚呼先生之文濂何敢序之文之難言久矣周秦以前固無庸議下此唯漢爲近古至於東都則漸趨於綺靡而晉宋齊梁之間俳諧骯骯歲益月增其弊也爲滋甚至唐韓愈氏始斥而返之韓氏之文非唐之文也周秦西漢之文也韓氏之文固佳獨不能行於當時逮宋歐陽修氏始效而法之歐陽氏之文非宋之文也

周秦西漢之文也。歐陽氏同時而作者。有曾鞏氏。有王安石氏。皆以古文辭倡明斯道。蓋不下歐陽氏者也。歐陽氏之文。如澄湖萬頃。波濤不興。魚鼈潛伏而不動。淵然之色。自不可犯。曾氏之文。如姬孔之徒。復生於今世。信口所談。無非三代禮樂。王氏之文。如海外奇香。風水齧蝕。木質將盡。獨真液凝結。斬然而猶存。是三家者。天下咸宗之。有元號稱多士。或出入其範圍。而鑿括其規模者。輒取文名。以故章甫逢掖之徒。每驕人曰。我之文學。歐陽氏也。學曾王氏也。殊不知三君子者。上取法于周于秦于漢也。所以學歐陽

氏而不至者其失也纖以弱學曾氏而不至者其失也緩而弛學王氏而不至者其失也枯以瘠此非三君子之過也不善學之其流弊遂至於斯也文之信難言者一至于此乎濂與先生劇談時未嘗不撫卷而三歎奈何狂瀾既倒滔滔從之而無有如先生之所慮者也不亦悲夫今觀先生之文非漢非秦周之書不讀用力之久超然有所悟入豐腴而不流於叢冗雄峭而不失於粗厲清圓而不涉於浮巧委蛇而不病於細碎誠可謂一代之奇作矣先生雖亡其絢爛若星斗流峙如河嶽者固未始亡也信於今而垂

於後者豈不有在乎如濂不敏童而習之顛毛種種猶不得其門而入凡先生之稱獎者皆濂之所甚愧者也先生之子煜乃持翠屏集來徵爲之序嗚呼先生之文濂何敢序之謾舉先生相與論文者書之於篇端庶幾讀先生之文者亦將知其用意之所在也夫詩若干卷文若干卷春秋經說若干卷不在集中先生諱以寧字志道姓張氏福之古田人泰定丁卯進士仕至翰林侍講學士云

夏鍾曰王季平言唐宋後學遂以爲口實讀此當爽然自失

馬先生歲遷集序

士之生斯世也。其有蘊於中者。必因物以發。譬猶雲
旣滃而靈雨不得不降。氣旣至而蟄雷不得不鳴。雖
其所發有窮達之殊。而所以導宣其堙鬱。洗濯其光
精者。則一而已矣。是故達而在上。其發之也。居廟朝
則施於政事。謀軍旅。則行於甲兵。嚴上下。和神人。則
見於禮樂。交隣國。則布於辭命。或窮而在下。屈勢與
位。不能與是數者之間。則其情抑遏而無所暢。方壹
假詩以洩之。詩愈多。則其人之愈窮也。可知矣。此濂
於嚴陵馬先生之詩。爲之深悲而不能自己者也。先
生諱瑩。字仲珍。建德縣新亭鄉人。其七世從祖大同。

官至禮部尚書族故盛矣先生自幼喜屬文而才氣
倜儻思欲以功業自見京師遠在數千里外而無有
薦於上者會延祐行科目取士之法先生以春秋禮
記舉皆不利先生歎曰非吾才不如今人人多褻章
服而吾猶被布韋其命也夫於是悉發之於詩凡身
之所歷山容水色民情物態莫不模寫靡遺當其良
朋勝友之集輒相率酣觴賦詩頃刻百餘言落筆弗
能自休雖不規規然騁工巧於片辭之間而其音節
之鏗鏘言辭之俊逸如揚颿大江風利桅勁一瀉百
里而畧無畱難之意世之人咸以此稱之而不知先

生之窮至是爲已甚矣。逮於晚年，其志益孤，乃倣柳
柳州製饒歌鼓吹曲十二章，將上之朝，又不果。因復
自放於重山密林中，時命客取琴鼓一再行，或吹洞
簫倚歌而和之，以釋其窮悴無聊之悲。不幸年五十
五，竟齋志以歿。先生歿後三十二年，其子鈞懼其遺
文將遂泯滅，以歲遷集四十卷者，俾濂爲之序。將圖
入梓以傳。濂生也，後恨不獲拜先生於牀下，而獨得
窺其詩文。又恨先生所蘊於其中者，不及顯融以見
於功業，而徒爲古窮人之辭。卒以棲遲，至於老死，豈
非所謂命也夫。昔者梅都官工於詩，累舉進士，輒抑

於有司其窮固亦甚矣。後數百年都官之名。山峙而
川流。設使都官得行其志。於當時其詩未必如此之
工。而其名亦未必如此之盛。是天欲窮之。乃所以達
之也。先生之事與都官正類。其身雖窮。而其詩之能
達。蓋無疑者。濂又何必深爲之悲。先生別有雜古文
十二卷。應科困天集若干卷。唐五百家詩選五卷。宋
南渡諸家詩選一卷。講義讀書記各二卷。不在集中。

夏鍾曰。紆餘委備
歐陽永叔之文

東軒集序

東軒集者。天台方君明敏之所作也。明敏仕於元。嘗

叅知政事於江渚行中書襟韻瀟灑而氣岸偉如發
於聲詩往往出人意表其弟明則繕鈔成帙同予學
子桂慎請予評之予曰古詩俊逸超群如王子晉鶴
背吹笙隨風抑揚聲在雲外律詩清麗婉切譬猶長
安少年飲酒百華場中鶯歌蝶拍春風煦然撲人終
日傳盃而醉色不起詩人之趣至是亦可謂之不凡
矣明則曰請爲之序以傳何如余曰寶劍薶於豐城
而紫氣上浮於天倚蘭生於幽谷而秋聲播于九衢
詩佳矣不必藉序以傳也曰此固然矣願卒一言之
曰詩之古者莫三百篇若也篇首各有小序所以序

作者之意而非後世通爲之序也。漢魏以降作者鮮
自白其意。讀之者不能知。乃私自臆度。此爲某事而
發。此爲某時而嘆。使若人不死。卽而叩之。恐其未必
爾也。故予嘗有言。作詩必自序。非他人之可與聞。此
言似不可忽也。曰。固哉。吾子之爲詩也。可以序。可以
無序。序之將何傷焉。余無以辭。因取所評者書之於
首簡云。明敏於書。無所不讀。最善談名理。與人交。煦
煦有恩意。君子賢之。其所長者。不特能詩而已也。

夏鍾曰。作詩序詩
者。讀此俱增一解。

往時湖湘間材士大夫多以辭賦稱。若江夏詹先生同文其一也。蓋同文襟韻瀟灑。濟以宏博之學。故體物瀏灋。鏗鏘作金石聲。及歸我熙朝。遂以文鳴一時。當勝友如雲。酒酣耳熱。有執卷來求者。同文振衣而起。捉筆四顧。文氣絢繡。從口鼻間流出。頃刻盈紙。爛爛皆成五色。觀者從傍鼓譟。且謂萬言倚馬可待者。將無大相遠。自是有問奇俊士。僉曰同文同文云。予與同文交且久。而同官翰林。初見之甚驚。後屢見之。竊自嘆賦才暗劣。規規方圓中。日蹈古人軌轍。不敢奮迅吐一奇崛語。雖見諸簡牘者。近一二千篇。奄奄。

如無氣人作文固當如是耶。去年之秋京畿試鄉貢士。今年南宮試天下士。同文皆持文衡。區區亦與聞末議。見同文考五經卷朗讀數行。輒搔觚書云云。書已復讀。又書云云。予視之。析理精緻。如漢廷老吏議法。是非重輕。卒不可掩。人以文辭稱同文。固未見其衡氣機如同文者。其何可及邪。其何可及邪。韓退之稱李杜文章。光焰萬丈。少陵之作。頓剉沉鬱。高不可攀。深不可探。謫仙之辭。飄飄然遊戲璇霄丹臺。吹鸞笙而食紫霞。絕去人間塵土。思此無他。精華發爲光耀。縱橫交貫。不自知其所止。退之言當不誣。同文之

能致是者豈無其故哉然予聞太史公周覽名山川
故作史記。燁燁有奇氣。同文他日西還。予將相隨泛
洞庭。浮沅湘。登大別。九疑之山。吸風吐雲。一洗胸中
穢濁。使虛極生明。明極光發。然後揮毫以尾。同文之
後。萃靈鳳之彩毛。擷天葩之奇馨。或者當有可觀。同
文果以爲何如邪。同文以天■集授予序。神思搖蕩。
急展牘書之。懼其凌空飛去。是爲序。

夏鍾曰。描寫詹學士才氣滔滔。汨汨淋漓。痛快不減。頗上三毛。

蘇平仲文集序

漢武帝欲教霍去病兵法。去病辭曰。顧方畧何如耳。

濂謂去病真能用兵者。古今之勢不同。山川風氣亦異。而敵之制勝伺隙者。常紛然雜出而無窮。吾苟不能應之以變通之術。而拘乎古之遺法。其不敗覆也難哉。爲文何以異此。古之爲文者。未嘗相師。鬱積于中。攄之於外。而自然成文。其道明也。其事覈也。引而伸之。浩然而有餘。豈必竊取辭語。以爲工哉。自秦以下。文莫盛於宋。宋之文莫盛於蘇氏。若文公之變化。俚偉。文忠公之雄邁。奔放。文定公之汪洋秀傑。載籍以來。不可多遇。其初亦奚暇追琢。絺繪以爲言乎。卒至於斯極而不可掩者。其所養可知也。近世道漓氣

弱文之不振已甚。樂恣肆者失之駁而不醇。好摹擬者拘於局而不暢。合啄比聲。不得稍自凌厲。以震盪人之耳目。譬猶敝帚漏卮。雖家畜而人有之。其視魯弓郢鼎。亦已遠矣。每讀三公之文。未嘗不太息也。蓋晚而得平仲焉。平仲文定公之裔孫。少警敏絕倫。誦說不勞而習。中歲大肆於文辭。精博而不麤。澁敷腴。而不苟縛。不求其似古人。而未始不似也。仕皇朝爲國子學正。近臣薦其才。擢國史院編修官。以曠辭歸。濂以翰林承旨致政將還。天子命舉可以自代者。卽以平仲應詔。旣至。復固辭。上亦憫其誠。特賜文綺遣。

之天下學士高平仲之文。而莫不惜其以疾困也。人有困於當時而貴於後世者。亦有貴於當世而後乃無聞者。其得失久近果何如哉。孰知平仲之困。乃所以成其至貴者乎。濂重平仲最甚。序論其文。所以歎蘇氏三公之不可及。而喜今世之復有斯人也。平仲名伯衡。其先居肩自。文定公長子徽猷閣待制遲來知婺州。遂家焉。今爲婺之金華人。去文定公十世矣。

夏鍾曰。平仲之困。所以成其至貴。窮愁著書。人讀之不覺神王矣。

朱葵山文集序

文不貴乎能言。而貴於不能言。日月之昭然。星辰

之煒然非故爲是明也。不能不明也。江河之流。草木之茂。非欲其流且茂也。不能不流且茂也。此天地之至文。所以不可及也。惟聖賢亦然。三代之書。詩。四聖人之易。孔子之春秋。曷嘗求其文哉。道克於中。事觸於外。而形乎言。不能不成文爾。故四經之文。垂百世而無謬。天下則而準之。自夫斯道不明。學者覩聖賢之文。而悅其不朽。於是始摹倣其語言。以爲工。而文愈削矣。夫天之生此人。也。則有是道也。有是道也。則有此文也。苟能明道而發乎文。則將孰禦乎。而能者寡矣。斯後世之文。所以不逮古也。後世之文。加之以。

百言而不知其有餘損其十言而不見其不足以不
本於道故爾此非發於不能不言而強言之弊也聖
賢之經其所不言也益以片辭則多矣其所言也刪
其一言則略矣以其不志於文此文所以卒莫能過
也故志於文者非能文者也惟志於道者能之元之
末莆田有朱先生文憲以治經取顯官有政事人皆
知之而其所爲文世則鮮知之其孫進士瀟近以示
余其言醇而理彰於理不合雖強之言不言其所言
者未嘗不本諸道惟其志於道而不以文名故言文
者失之嗚呼人能因余言以求先生之文庶幾得其

所存先生字原道以泉州路總管致仕其歷官政事見予所撰墓銘故不著

夏鍾曰先生論文每衷諸道故非雕蟲篆刻所能及

吳濰州文集序

唐子西云六經之後便有司馬遷班固六經不可學學文者舍遷固將奚取法嗚呼斯言至矣濂嘗諷二家書遷之文如神龍行天電雷惚恍而風雨驟至萬物承其濺澤各致餘妍固之文類法駕整隊黃麾後前萬馬來仗六引分旌而循規蹈矩不敢越尺寸嗚呼法之固堪法其能以易致哉然而淵冲之容可以

覽結雄毅之氣。可以掇拾古語有云。取法者宜上。固
當有潛心而願學者矣。濂猶恨未見其人。豈逸駕奔
馳。實不可攀歟。抑去古逾遠。聲光不可得而襲歟。吾
友吳履德基。同郡人也。自幼抱逸才。一下筆間。飄飄
有奇崛氣。逮長日。取二家書玩繹。弗倦。超然若有得。
揚揚出。謂人曰。我知學。司馬遷爾。我知學。班固爾。諸
子益不足多也。濂頗畏之。疑之日後。德基去丞南康。
令安化。今將出守濰州。與濂胥會南京。持所製文一
編。且讀且譁曰。我此文近遷固。否。濂見其勁硬如屈
鐵。奇峭如削。懸崖澤媚。山暉如蘊。珠涵璧始而大驚。

中而釋所疑終則益畏之而發不可企及之嘆嗚呼
善學遷固者世久罕聞今乃見其人哉雖然立言如
六經此濂夙夜所不忘者德基尚勗之母徒泥子西
之言而自沮也

夏鍾曰主意在結束數語
先輩不妄諛人類如此

靈隱大師復公文集序

才體也文其用也天下萬物有體斯有用也若稽厥
初玄化流形品物昭著或洪或纖或崇或卑莫不因
才之所受而自文焉非可勉強而致也姑就植者言
之黃者白者青者紅者黑而澤者紫豔而腴者翠白

而細綠者。五色交揉。變幻而不恒者。一囿於氣而弗
可移也。至於洛陽有花。則絕類絕倫。其植物中之至
文者歟。又以動者言之。雙角而火鬣者。兩羽而飛者。
炳朗而爛斑者。介而紫暈者。鱗而含金者。衆彩錯布。
焜煌而難名者。亦局乎氣而不能更也。至於岐陽有
鳳。則超群拔萃。其動物中之至文者歟。非惟物也。而
人亦然。有一人之人。有十人之人。有百人之人。有千
萬人之人。有億兆人之人。其賦受有不齊。故其著見
亦不一而足。所謂億兆人之人。聖人是也。千萬人之
人。賢人是也。百十人之人。衆人是也。衆人之文不足。

論賢人之文則措之一鄉而準措之一國而準措之四海而準聖人之文則幹天地之心宰陰陽之權掇五行之精無鉅弗涵無微弗攝雷霆有時而藏而其文弗息也風雲有時而收而其文弗停也日月有時而蝕而其文弗晦也山崖有時而崩而其文弗變也其博大偉碩有如此者而其運量則不越乎倫品之間蓋其所稟者盛故發之必弘所予者周故該之必備嗚呼此豈非體大而用宏者歟或曰上帝降衷不以知愚而有偏若子之言不幾局囿乎氣而不遷者乎曰非是之謂也其性同其才或不同雖以七十子

之從聖人。其學各得其才之所近。况下此萬萬者乎。
由是而觀。因才所受。而自文者。人與動靜之物。槩可
見矣。濂之學文五十餘年。群書無不觀。萬理無不窮。
碩師鉅儒。無不親自意。可以造作者之域。譬諸登山。
攀躋峻絕。不爲不力。而崇巔咫尺。不能到也。此無他。
受才之有限也。世固有卮匱者焉。有甕盎者焉。有沼
池者焉。有溪澗者焉。有湖江者焉。有溟渤者焉。水充
其重則止。小固不能爲大。大亦不能爲小也。濂昔官
禁林。四方以文來見者甚衆。晚閱見心復公之作。穠
麗而演迤。整暇而森嚴。劍出襍而珠走盤也。發爲聲

歌其清朗橫逸。絕無流俗塵土之思。寘諸古人篇章中。幾不可辨。遐邇求者。日接踵于門。旣得之。不翅木難珊瑚之爲貴。公卿大夫。交譽其賢。名聞九天。皇上詔侍臣。取而覽之。特褒美弗置。濂因謂當今方袍之士。與逢掖之流。鮮有過之者焉。今來朝京師。其徒曇錚。編類成書。釐爲十卷。宋徵濂爲之序。嗚呼。文者造化之英華。古今之綸貫。斷不可闕也。有若公者。拔于十百之中。超然騫舉。而慕賢者之閭奧。其可傳遠無疑。濂烏得不倡體用之說。以諗同志哉。有訕濂陷于一偏。而不可爲訓者。非知言者也。不加功于文者也。

是膠柱調瑟而弗知變通者也。

夏鍾曰先生晚而好佛所爲釋子序
記碑記甚多余僅存其一二首如此

